

Primera carta de San Pablo a los CORINTIOS

Corinto vāme cūti macana, Cristore ajitirūnūrāre Pablo ĩ ucaċōare queti

¹⁻³ Adi quetire mūare cōagū, Pablo vāme cūtigū ñaja yū. ¿Ñati mūa, Corinto macana, Dios suori ĩ macu ocare ajitirūnūcōari, rējarūgūrā? Jesucristo ĩ rijabosare ñajare, “Rojose mana ñaama” yicōari, “Yū rīa ñaama” Dios ĩ yīarā ñaja mūa. Sóstenes rāca ñacōari, mūa rī mere ucaja yūa. “Mani ũjūre Jesucristore sēnirā jediro, adi quetire ajiato” yirā, ucaja yūa. Mūare quēnarotirā, mani jacu Diore, to yicōari, Jesucristo, mani ũjūre, ado bajise mūare sēnibosaja yūa: “Quēnaro mūa rāca ĩna ñarotire yirā, ĩnare ejarēmoña”, mūare yisēnibosaja yūa. Dios ĩ bojarore bajiro yūre cōacami Jesucristo, “Yū suorine yū jacu quēnaro ĩ yise quetire gājerāre gotimasioduciya mū” yigū.

“Mūa bajisere tūoīacōari, ‘Quēnaro yaja mū’ Diore yaja yū”, Pablo ĩ yire queti

⁴ Tocārācajine Dios, mani jacure sēnigū, mūare quēnaro ĩ yisere tūoīacōari, “Quēnaro yaja mū”, ĩre yivariquēnarūgūaja yū. Jesucristore ajitirūnūrā mūa ñajare, quēnaro mūare yirūgūami Dios. ⁵ ĩre ajitirūnūrā mūa ñajare, ĩ oca jediro quēnaro riojo ajimasicōari, mūa gotimasiorotire, to yicōari, ĩ bojarore bajiro mūa yimasiorotire yigū, mūare ũjoyumi Dios. ⁶ To bajiro mūare ĩ yire ñajare, Cristo ĩ bajirere mūare yūa gotimasiosere ajicōari, “Socase me ñaja”, yicaju mūa. ⁷ Ñajediro mūa yimasiroti mūare ĩ ũjore ti ñajare, mani ũju Jesucristo ĩ tudiejarotire yurāre, ñie ruyabetoja, mūare. ⁸ “Yūre quēnaro ajitirūnūcōa

ñato” yigu, mũare ejarẽmorũcumi. To bajiri, Jesucristo ï ejarirũmũre, ñimũjuane, “Rojose yirã ñaama”, mũare yimasigũ manirũcumi. ⁹ “‘Yirũcũja’ ï yimore bajiro yigu ñari, manire ejarẽmorũcumi Dios”, yimasiaja mani. ï ñaami, “Jesucristore ajitirũnũña” yirere manire cõagũ. To bajiri ï ejarẽmose suorine mani mũu, Cristore ajitirũnũrã ñari, quẽnaro gãmerã baba cutirũgũaja mani.

Corinto macana ricati rĩne ñna tuoĩare queti

¹⁰ Yũ mairã, yũ gotirore bajiro yirã ñaboarine, gajeye mũa yise quẽnabeaja. Mani mũu, Jesucristore yibosagu, ado bajiro mũare yaja yũ: Rojose mũa yijama, “Juaji rojose yimenesa mani” yicõari, sũgũre bajiro tuoĩaña. ¹¹ “To bajiro yama Corinto macana” Cloé yarã ñna yisere ajicõari, to bajiro mũare yaja yũ. ¹² Ado bajise yũre gotiama: “Sũgũri, ‘Pablõre ajisũyarã ñaja yũ’, gãjerãma, ‘Apolõre ajisũyarã ñaja yũ’ yama. Gãjerãma, ‘Pedrore ajisũyarã ñaja yũ’, gãjerãma, ‘Cristore ajisũyarã ñaja yũama’ yama”, yũre yigotiama Cloé yarã. ¹³ ¿No bajiro yirã to bajise ñagõjaiati mũa? “Mani mũu Cristo sũgũne ñaami” yirã ñaboarine, “Jã-jarã ñaama mani mũjarã” yisocarãre bajiro yĩñaja mũa. ¿Yũ, Pablõne rojose mũa yire vajare yirẽtobosagu, yucũtẽrojũ rijabosayujarique yũ? “Pablõre ajitirũnũrã ñaja yũ” yirã me, oco rãca bautiza ecoyuja mũa. ¹⁴⁻¹⁵ “Crispo vãme cutigu, to yicõari, Gayo vãme cutigu, ñna rĩne ñacama oco rãca yũ bautizacana”, yituoĩaja yũ. To bajiri mũa rãcana, “Pablõre ajitirũnũrã ñaja yũ”, yimasirã manama. Tire tuoĩacõari, “Tocãrãcũne ñacama yũ bautizacana”, Diore ïre yivariquẽnaja yũ. ¹⁶ Estẽfanas ya viana quẽne ñacama oco rãca yũ bautizacana. To cõrone yiriaja yũ. ¹⁷ “Oco rãca masare ñnare bautizacudiaya” yigu me, yũre cõacami Cristo. “Yũ suorine Dios quẽnaro masare ï yisere gotimasiocudiaya” yigũjua, cõacami. “‘Quẽnaro ï gotimasiojare, ïre ajitirũnũaja yũ’ yato” yigu, me yũre

cōacami. To bajiro ñna yijama, “Yucútērojū rojose mani yise vajare yirētogū, manire rijabosayumi’ yituoīarā me ñaruarāma”, yure yicami Jesucristo.

“Jesucristo manire ĩ rijabosare, ñamasuse oca ñaja”, yire queti

¹⁸ Yucútērojū Cristo ĩ rijabosarere ajicōari, “Socase ñaja”, yituoīaama rojose tāmūotujabetiriarojū varona. Dios tujū varonajūama, ti quetire ajicōari, “Masijeogū ñaami Dios. ĩ sīgūne ñagūmi rojose mani tāmūoborotire yirētobosarocū”, yituoīaama. ¹⁹ Tire bajirone gotiaja Dios oca masa ñna ucamasire:

“‘Masirā ñaja yua’ yirāre masimenare bajiro ñnare yirucūja yu, yure ñna masirotire yigū”, yigotiaja Dios oca masa ñna ucamasire.

²⁰ To bajiri, “Dios ĩ rotimasire riojo gotimasiorā ñaja yua” yirāre, to yicōari, gājerā, “Adi macarucuro ñase jedirore masirā ñaja yua” yirāre masimenare bajiro ñnare yami Dios. ²¹ Masijeogū ñaami Dios. To bajiri adi macarucuroana, masa ñna masune ñna buese, ñna tuoīase suori ĩre ñna masirotire bojabesumi. Ado bajirojua ñna yisejūare bojayumi: ĩ macū ĩ bajirere ajitirūnūrā rīrene rojose ñna tāmūoborotire ñnare yirētobosagū ñaami Dios. To bajiri ti ocare ajicōari, “To bajiro yimecurā yama. Socase ñaja”, yama Diore masimena.

²² To bajiri, jud'io masa quēne, ti quetire ñna ajitirūnūsuroto rījoro, “Socase me ñaja yua yirotere yirā, ĩaīañamani yūare yīoña”, yirā ñaama. Griego masajūama, “Quēnaro ñna gotijama, ñnare ajisuyaruarāja mani”, yirā ñaama. ²³ To bajiro ñna yituoīaboajaquēne, yūajūama, yucútērojū Cristo manire ĩ rijabosarere gotimasiorūgūaja. Jud'io masa ñna ajitese, griego masa, “Yimecurā yama” yūare ñna yisere yirūgūaja yua. ²⁴ To bajiboarine, Cristo ĩ bajirere yua gotimasiosere ajicōari,

jud'io masa, griego masare quēne, “Yū macure ajitirūnūña” Dios ĩ yirere ĩna cūdjama, ĩ masisere ĩnare cōaami. To ĩ yijare, “Masijeogū ñaami Dios”, yirūgūama. ²⁵ Gājerājua, Diore masimena ñari, “Yimecūrā yama Cristore ajitirūnūrā”, yituoīaboama. To bajiro ĩna yiboajaquēne, “Masijeogū ñaami Dios. ĩre bajiro yimasigū magūmi”, yimasiaja mani, ĩ ocare ajitirūnūrāma. ²⁶ Yū mairā, Dios mūare ĩ besere tuoīaña mūa. Jājarā me ñacajū mūa, ñamasurā, masare rotirimasa, to yicōari, “Masirā ñaama” Diore masimena ĩna yīārā. ²⁷ To bajiro mūa ñarotire bojayumi Dios. “Tuoīamasimena ñaama’ masa ĩna yirā, to yicōari ĩna rūcubuomena ñaruarāma yū macure ajitirūnūrā”, yiyumi Dios. To bajiro ĩ yijama, “Masirā ñaama’ Diore masimena ĩna yirūcubuoārē, ‘Masirā me ñañuma’ yato” yigū, yiyumi. ²⁸ “Ñamasurā me ñaama’ to yicōari, ‘No yimasimenama’ masa ĩna yirājua, yū macure ajitirūnūruarāma”, yiyumi Dios. “Ñamasurā ñaama’ masa ĩna yīārā, ñamasurā me ñato” yigū, to bajiro yiyumi. ²⁹ To bajiro yigū ĩ ñajare, ĩ ĩaro rījoro, “Masa ĩna rūcubuoogu, ñamasugū ñari, mū macū ĩ bajirere ajicōari, ‘Riojo gotiaja’ yicajū yū”, ĩre yirocū magūmi. ³⁰ To bajiri Dios suorine Jesucristo ĩ bajirere ajicōari, ĩ yarā ñaja mūa. To bajiri, Dios ocare ñamasusere masirā ñaja mūa. Rojose mūa yisere ĩ masiriojama, Cristo ĩ rijabosare suorine, “Rojose mana ñaama” Dios ĩ yīavariquēnarā ñaja mūa. ³¹ Dios macū suorine to bajiro mūa bajise ñajare, ado bajiro gotiaja Dios ocare masa ĩna ucamasire: “Ñamasurā ñaja yua’ yituoīamenane, ‘Manire quēnaro yiyumi Cristo. ĩjua ñaami ñamasugū’ yivariquēnaroti ñaja”, yigotiaja Dios ocare masa ĩna ucamasire.

2

“Masigū ñaja yū” masa ĩna ĩaro rījorojua, yibecūne,

Cristo ĩ bajirere Pablo ĩ gotimasiore queti

¹ Dios oca masa ĩna masibetirere muare yu gotimasocatire tuoĭaņa mũa, yu mairã. “Masigũ ñaami’ yũre yĩato ĩna” yigu me, muare goticaju yu. ² “Yucútẽroju Jesucristo ĩ rijabosare rĩne ĩnare gotirucuja” yituoĭagũ ñari, to bajiro muare goticaju. ³ Mũa tu ejagu, gotimasiobetirocare bajiro muare bojonecaju yu. To bajiro bajigu ñari, nanacaju yu. ⁴ Cristo ĩ bajirere muare yu gotiguadijama, “Masirã ñaja yua” yirã ĩna yimore bajiro me muare goticaju yu. “Pablo quẽnaro ĩ gotijare, Cristore ajitirũnũaja yua’ yato” yigu me, muare goticaju. Muare yu gotimasioro, Esp'iritu Santo ĩ masise rãca ĩ ejarẽmojare, “Riojo gotiami Pablo”, yũre yiajitirũnũacaju mũa. ⁵ To bajiri, masa ĩna masise rãca me ajimasicõari, Cristore ajitirũnũacaju mũa. Dios ĩ masise muare ĩ cõajare, Jesucristore ajitirũnũacaju mũa.

“Esp'iritu Santo ĩ ejarẽmose rãca Diore masire ñaja”,
Pablo ĩ yire queti

⁶ Jesucristo ocare quẽnaro ajitirũnurã ĩna ñajama, yua gotimasiorotire Dios ĩ cõajare, josabusase ĩnare gotimasiorũgũaja yua. Yua gotimasiose, adigodoana, masirã, to yicõari, ujarã ĩna masise me ñaja. ĩna masiboase rãcane ĩna rijato, yayicoaruaroja tijuama. ⁷ Yua gotimasiosejuama, Dios ye, ĩ masise, ĩ cõase ñaja. Ti oca, masa ĩna masibeticati ti ñaboajaquẽne, adi macarucuro ĩ rujeoroto rĩjoroju, “Masare quẽnaro yirucuja” ĩ yimasire ñaja. ⁸ Adigodoana ujarã tire ajimasirã manicama. Tire ĩna ajimasijama, manĩ uju Cristo quẽnamasugũre, “Yucútẽroju ĩre jajutu sĩacõaņa”, yibetiboriarãma ĩna. ⁹ To bajirone gotiaja Dios ocare masa ĩna ucamasire:

“Dios, ĩre mairãre, ‘Quẽnase ĩnare ujurucuja’ yi goti rĩjoro yiyumi. Masa ĩna ĩabetirũgũre, ĩna ajiĩabe-

tirügüre, to yicõari ñna tuoĩabujabetirügüre quẽne ñaja”, yigotiaja Dios oca masa ñna ucamasire.

¹⁰ Yucurema, mani masibetirügürere Esp'iritu Santo ï ejarẽmose suorine Dios ï ƣjosere masiaja mani. Ñajediro masiami Esp'iritu Santo. Dios ï tuoĩasere quẽne masigũ ñaami.

¹¹ Gãjerã ñna tuoĩasere, “To bajiro tuoĩama”, yimasiña maja. Mani masu mani tuoĩase rĩne masire ñaja. To bajirone bajiaja, Dios ï tuoĩase quẽne. Mani masibetiboajaquẽne, Esp'iritu Santo sīgũne masiami, Dios ï tuoĩasere. ¹² To bajiboarine, adigodoana Diore masimena ñna tuoĩase ùni mere manire cõañumi Dios. Esp'iritu Santojũare manire cõañumi, manire ï ƣjosere quẽnaro mani ajimasirotire yigũ. ¹³ To bajiri yua gotimasiojama, gãjerã yũare ñna gotimasiore mere gotimasiorigũaja. Esp'iritu Santo yũare ï ejarẽmojare, quẽnaro gotimasiorigũaja yua.

¹⁴ Esp'iritu Santore cuomena, ï ejarẽmose rãca yua gotimasiore ajicõarã ñaboarine, ajimasimena ñari, “Tuoĩamasimena ye ñaja”, yicõama. To bajiro ñna yiboajaquẽne, Esp'iritu Santo suorine Dios yere quẽnaro ajimasire ñaja. Esp'iritu Santore cuomena, ï ocare ajimasimenama. ¹⁵ Esp'iritu Santore suorãjũama, masa ñna yise jedirore ïacõari, “Quẽnaro yama. Rojose yirã yama”, yimasiam. To bajiro yirã ñna ñajare, Esp'iritu Santore cuomenajũama, ñna yisere ïacõari, “Socarã yama”, ñnare yimasibeama. ¹⁶ Dios oca masa ñna ucamasire ado bajiro ti gotijare, “Esp'iritu Santore suorã ñna yisere ïacõari, ‘Socarã yama’ ñnare yimasibeama Esp'iritu Santore cuomena”, mũare yaja yũ: “Mani ƣjũ, ï tuoĩasere masigũ magũmi. Ñre gotimasiogũ magũmi”, yigotiaja Dios oca masa ñna ucamasire. To bajiro ti gotiboajaquẽne, Esp'iritu Santo suorine Cristo ï tuoĩarore bajiro tuoĩarã ñaja mani.

3

“Dios ĩ bojasere yirã ñaja yua”, Pablo ĩ yire queti

¹ Mua tujũ ñacudigu, Esp'iritu Santo ĩ bojarore bajiro yirãre yu gotimasiocatore bajiro muare gotimasio-beticaju yu. Cristore ajitirũnušorã mua ñajare, Diore tũoĩabeticõari ĩna masune ĩna bojarore bajiro yirãre yu gotimasiocatore bajiro muare gotimasiocaju yu. ²⁻³ Cristo ĩ gotimasiorere, josari me busane ajimasirere muare gotimasiorũgũcaju. “Yu gotimasiosuocere ajimasibeticõa ñaama” yigu, josasere muare gotimasio-beticaju. Yucu quẽne to bajirone bajicõa ñarãja mua maji. Beroaye muare gotimasioroti ti ñaboajaquẽne, muare yu goti-masioboacatirene tudigoticõaroti ñaroja. Mua masune mua bojarore bajiro mua yicõa ñajare, to bajiro yaja yu. Gãjerã ĩna bajisere ĩacõari, “Yuã rẽtoro quẽnaro ñaama” yĩajũnisini, ñagõjai, bajiñarãja mua. To bajiro mua bajiñajama, Esp'iritu Santore cuomenare bajiro mua masune mua bojarore bajiro yicõa ñarãja. ⁴ Ado bajiro yirã mua ñajare, to bajiro yaja yu: “Sigũri, ‘Pablöre ajisuyarã ñaja yua’, gãjerãjuama, ‘Apolöre ajisuyarã ñaja yuama’ yirũgũama” ĩna yisere ajaiaja yu.

⁵ Apolos, ñamasugũ me ñaami. Yu quẽne, ñamasugũ me ñaja. Diojua ñaami ñamasugũma. ĩre moabosarimasa ñaja yua. Tocãrãcune, mani ujũ, yuare ĩ moaroticõariarore bajirone moaja yua. Yuã gotimasio-re suorine Cristore ajitirũnušoyuja mua. ⁶ Yu, muare Cristo ocare gotimasiosuocaju. Yu gotimasioro bero, butobusa muare gotimasiorẽmoñumi Apolos. To bajiro yua yisere ejarẽmoami, Dios “Butobusa Cristore ajitirũnuato” yigu. ⁷ To bajiri Cristo ĩ bajirere gotimasiosuorã, ĩna bero tire gotirẽmorã quẽne, ñamasurã me ñaja yua. Diojua, ñaami

ñamasugũma, “Yu macure ajitirũnucõari, butobusa ajitirũnurũtuajaro ñna” yigũma. ⁸⁻⁹ Gotimasiosuorã, gotimasioremorã, cojoro cõro ñacõaja yua, Diore moabosarã. Tocãrãcure ñre ñna moabosase vaja, vaja yirucumi Dios. Mua ñaja Dios ñ ñatirũnurã, yuare ñ moaroticõarijũre bajiro bajirã. To bajicõari, Dios ñ quẽnorivire bajiro bajiaja mua. ¹⁰ Yujua, ti vire buasugure bajiro bajigu ñaja. Dios, yure ñ yirẽmojare, ñ oca ñamasusere quẽnaro muare gotimasiosocajũ yu. Yu gotimasioro bero gotimasioreã, yure buarẽmorãre bajiro yirã ñaama. To bajiri, quẽnaro riojo Dios ocare ñnare gotimasioreti ñaja. ¹¹ Ado bajise muare gotimasiosocajũ yu: “Jesucristo manire ñ rijabosare ñajare, rojose mana, Dios ñ ñavariquẽnarã ñaja mani”, yigoticajũ yu. Ti oca ñaja ñamasuse. Gãjerã ricati ñna gotimasiojama, Dios ye mere gotimasioreã yirãma. ¹²⁻¹³ Siggũri, Dios ocare ñna gotimasiojama, quẽnaro riojo gotirãma. Gãjerãma, quẽnaro riojo gotimasiomenama. Tocãrãcurene gotimasioreimasare, “Quẽnaro gotiyuma. Quẽnaro gotimasibesuma”, yimasiruarãja mani, masa jedirore Dios ñ ñabeserĩmũjũ. To bajiri, ñna gotimasiorere, “Quẽnase ñaja” yimasiru, jeameju tire soeĩagũre bajiro yirucumi Cristo. ñna gotimasioire quẽnase ti ñajama, uabetoja. Quẽnabeti ti ñajama, uajedicoaruaroja. ¹⁴ Quẽnase ñari, ti uabetijama, vaja yirucumi Cristo. ¹⁵ Rojose ñari, ti uajedicoajama, rojose tãmuoruarãma quẽnaro yibetiriarã. Rojose tãmuoroti ti ñaboajaquẽne, rojose tãmuotujabetiriaroju ñnare cõabetirucumi Cristo, ñre ajitirũnurã ñna ñajare. Vi ti uaro rudi budirãre bajiro bajiruarãma.

¹⁶ ¿“Esp'iritu Santore cuorã ñaja mani”, yimasibeatique mua? ¹⁷ Dios yarã ñaja mua. To bajiro bajirã mua ñajare, gãjerã rojose muare ñna ñmato yijama, ñmato yirãjuare buto rojose ñnare yirucumi Dios.

¹⁸ Mua masune socabesa. Adigodoaye rĩne tuoĩarã,

“Masirã ñaja yua” ñna yituoïarore bajiro mua yijama, mua masune socarã yirãja. “Ñamasurã me, masirã me ñaja”, yituoïaroti ñaja muare. To bajiro mua yijama, ñamasurã ñaruarãja mua. ¹⁹ Dios ï ñajama, ïre ajitirũnumena ñna tuoïase, tuoïamasimena ye ñaja. Dios ocare masa ñna ucamasire ado bajiro ti gotijare, to bajiro bajaia: “ ‘Dios oca socase ñaja’ yituoïarã ñari, ‘Yua masise rãca ado bajiro yiruarãja’ yituoïaboarãre matarũgũgũmi Dios, ‘Masimena ñaboarine, to bajiro tuoïañuja mani’ yimasianto” yigũ. ²⁰ Quëna gajeju ado bajiro gotiaja Dios ocare masa ñna ucamasire: “Yure ajitirũnumena, ‘ “Masirã ñaja yua” ñna yituoïaboase, vaja maja’ yimasigũmi Dios”, yigotiaja Dios ocare masa ñna ucamasire. ²¹⁻²² To bajiri, “Muare gotimasiorimasu rëtoro yimasigũ ñaami yuare gotigu”, mua rãcanare yivariquë nabesa. No yirã to bajise yime-naja. Yũ, Pablo, Apolos, to yicõari, Pedro, yua jediro, muare moabosarimasare bajiro muare ejarëmorã, muare gotimasioaja yua. Adigodoaye jediro muare cũbosayumi Dios. Tire masicõari, ï ocare ajitirũnurã quënarõ ñaja mua. To bajiri, mua rijato bero quëne, Dios tũju quënarõ ñarũgũruarãja. ²³ Dios macu yarã mua ñajare, jediro mua ye rĩne ñacõaja.

4

Jesucristo ocare gotimasiorimasa ñna bajire queti

¹ Muare gotimasiorimasare: “Cristore moabosarimasa ñaama”, yuare yiya mua. ï oca masa ñna masibeticatire yuare gotimasioroticõacami Dios. ² Moabosarimasa mani ñacõa ñaruajama, ñna rotirore bajirone cudirũgũroti ñaja. ñna bojarore bajiro ñna yijama, ñnare rotigũju, quënarõ ñnare ñavariquë nagũmi. ³ Yũjuarema, “Cristo ï bojarore bajiro quënarõ moagũ ñaami Pablo” mua yijama, mua yibetijaquëne, no yibeaja yurema. Masa ujarã quëne,

“Cristo ĩ bojarore bajiro quēnaro moagũ ñaami Pablo” ĩna yijama, ĩna yibetijaquēne, no yibeaja. Yũ masune, “¿Cristo ĩ bojarore bajiro quēnaro moati yũ, moamasibeatique yũ?”, yituoĩabeaja yũ. ⁴ No yigũ to bajise tuoĩabecũja. Cristore quēnaro moabosadicajũ. To bajiro yũ yiboajaquēne, “Cristo ĩ bojarore bajiro quēnaro moacami Pablo” yire ũni me ñaja ti. Mani Ʃjũ Cristo ñaami, “Yũ bojarore bajiro quēnaro moacami. Quēnaro moabeticami” yimasirocũma. ⁵ To bajiro yirocũ ĩ ñajare, Cristo ĩ tudiejaroto rĩjoro, “Āni quēnaro moaami. Ījũa, quēnaro moabeami”, yũare yibetiroti ñaja mũare. Masa ĩna ajibeto, mani yisere, mani tuoĩasere quēne, ĩ tudiejarirũmũ, “Ajjedicõato masa” yigũ, manire gotirotirũcũmi. To cõrone mani yirere ĩabesejeomasirũarãja mani. Quēnaro yiriarãre, “Quēnaro yicajũ mũa”, ĩnare yirũcũmi Dios.

⁶ “‘Dios oca mũare gotimasiorimasare ado bajiro tuoĩaroti ñaja’ yimasianto ĩna” yigũ, Apolos ĩ bajisere, to yicõari, yũ bajisere mũare gotibũ yũ. “Yũa bajisere tuoĩacõari, Dios ocare masa ĩna ucamasire ti gotirote bajiro tuoĩato ĩna quēne” yigũ, to bajiro mũare yibũ yũ, ado bajiro tuoĩarã mũa ñajare: “Yũare gotimasioğũjũa, mũare gotimasioğũ rētoro masigũ ñaami”, yaja mũa. To bajiro yibetiroti ñaja. ⁷ “Yũare gotimasioğũjũa, mũare gotimasioğũ rētoro masigũ ñaami” mũa yijama, “Gãjerã rētoro masirã ñari, butobusa masigũre besemasiaja yũa” yirã yirãja. “To bajiro yirã ñato” yigũ me mũa masirotire Ʃjoyumi Dios. Jediro mũa masise Dios ĩ Ʃjore ñaja. To bajiri, Dios ĩ Ʃjore ti ñaboajaquēne, Ʃmũa masune tuoĩacõari, “Masirã ñaja yũa” yirãre bajiro yati mũa? Tire yibeticõaña.

⁸ Ʃjarãre bajiro tuoĩarũğũaja mũa. To bajiro tuoĩarã ñari, “Īna gotimasiosere bojabeaja. Masimena ñaama”, yũare yĩĩaja mũa. Dios yere quēnaro masirã mũa ña-

jama, yua quēne, mũa masisere ajitirũnuborãja. ⁹ To bajiri, “Dios yarã ĩ ãamaimena ĩ cũriarãre bajiro bajiaja”, yituoĩaja yua. “Vaja mana ñaja mũa. Mũa sĩa ecosere ĩaruarãja” masa ĩna yirãre bajiro bajiaja yua. “ ‘Adi macarucuroana, õ vecana ángel mesa quēne, Cristore ajitirũnurã rojose ĩna tãmosere ĩna ĩarũajama, ĩnare ĩato’ yigũ, yũare cũñumi Dios”, yituoĩaja yua. ¹⁰ Cristo ĩ bojasere yirã yua ñajare, “Tuoĩamasimena ñaama”, yũare yama masa. To bajiro yũare yiboarine, mũajũarema, masirãre bajiro mũare ĩama. “Dios ĩ ejarẽmobetijama, ĩ ocare quẽnaro gotimasimenaja manĩ”, yituoĩarã ñaja yua. To bajiro yirã yua ñaboajaquēne, “Dios oca quẽnaro masiaja yua”, yirũgũaja mũa. Gãjerã ĩna rũcũbũorã mũa ñaboajaquēne, yũarema rũcũbũobetirũgũama masa. ¹¹ Tirũmũju yua bajicatore bajirone bajicõa ñarũgũaja yua, adirodorire quēne: Bũto ñiorija, oco idirũaboa, sudi manĩ, masa quēne rojose yũare yirũgũama. Yua ñarotivi quēne, maja yũare. ¹² Dios ocare gotirã ñaboarine, yua masune bũto josari moarũgũaja yua, yua ñase vaja, yua base vaja, vaja yiruarã. Gãjerã yũare ĩna ajatud'iboajaquēne, “Quẽnaro mũare yato Dios”, ĩnare yicũdirũgũaja yua. Rojose yũare ĩna yiboajaquēne, ĩnare gãmebetirũgũaja. ¹³ Yũare ĩna tud'iboajaquēne, quẽnasejũare tuoĩacõari, ĩnare gotirũgũaja yua. Tirũmũju yũare ĩna ĩatecatorre bajirone ĩatecõa ñarũgũama.

¹⁴ “Yũ ucacõasere ĩacõari, ajibojoneato” yigũ me, adi quetire mũare ucacõaja yũ. Yũ mairã, yũ riãre gotimasiogũre bajiro mũare gotiaja yũ, “Quẽnaro riojo masiato ĩna” yigũ. ¹⁵ Cristo ĩ bajirere mũare gotimasiorã, diez mil ñarã ĩna ñaboajaquēne, yũ sĩgũne ñaja, mũare gotimasiosũocacũ. Yũ gotimasiosere ajicõari Jesucristore ajitirũnũsũocajũ mũa. To bajiri mũa jacũre bajiro bajiaja yũama. ¹⁶ To bajiro yũ bajijare, yũ yirũgũcatorre bajiro mũa

yijama, quēnaroja.

¹⁷ To bajiro mua bajiro tire bojagu ñari, Timoteore, muare ejarēmoroçure, muare cōaja yu. “Cristore ajitirūnugū ñari, ado bajiro bajirūgūami Pablo”, muare yigotirucumi, Jesucristore ajitirūnurā jedirore yu gotimasiocatire. Yu macu, yu maigūre bajiro bajigu mani uju ĩ bojasere yigu ñaami Timoteo. ¹⁸ “Juaji ejabecumi Pablo” yituoīarā ñari, sigūri mua rāca “Ñamasurā ñaja yua”, gāmerā yivariquēnarāja mua. ¹⁹ “Yu varotire Dios ĩ bojjama, yoaro mene muare ĩagū varucuja”, yituoīaja yu. Mua tu ejacōari, to bajiro gāmerā mua yiñasere masirucuja yu. Dios ĩ ejarēmose rāca mua yijama, mua rāca butobusa Cristore mua ajitirūnuserere quēne ĩamasirucuja. ²⁰ Ado bajise ti bajijare, to bajiro yaja yu: Dios yarā me ñaama socarāne, “Diore ajirā ñaja yua” yigotiboarine, ĩ bojarore bajiro yimena. ĩ yarā ñaama ĩ ejarēmose rāca ĩ bojarore bajiro yirā. ²¹ To bajiri mua tu ejacōari, ¿no bajiro muare yu yiro tire bojati? Rojose mua yisere mua yitujabetijama, tutuaro muare gotirucuja yu. Tire mua yitujajama, muare yu maisere quēnaro muare gotirucuja yu.

5

Ĭ jacu manajore ajerio cūfigure Pablo ĩ burocarotire queti

¹ Gaje vāme muare gotirujaja yu. Sigū mua rācagu ĩ jacu manajore ĩ ajerio cūtisere ajibu yu. To bajiro ĩ yijama, buto rojose yigu yiyumi. Gājerājuama, Diore ajimena ñaboarine, ti ũnire yimenama ĩna. ² To bajiro yirā ñaboarine, “Dios oca masirā ñaja yua”, yivariquēnarāja mua. Mua rācagu rojose ĩ yisere ĩasūtiriticōari, ĩre burocaroti ñaboayuja ti. ³⁻⁴ Mua rāca ñabetiboarine, mua rāca ñagūre bajiro tuoīaja yu. Mani uju Jesucristo ĩ

ejarēmose rāca, “Ado bajiro ĩre yiroti ñaja”, yimasajaja yu, ĩ jacu manajore ajerio cutigure. To bajiri mua rējaroju, mua rāca ñabetiboarine, yu tuoĩasejuma mua rāca ñarucuja yu. To bajicōari, mani uju Jesucristo quēne, mua rāca ñarucumi, muare ejarēmogũ. ⁵ ĩ jacu manajore ajerio cutigure, “Satanás ĩ bojarore bajiro rojose ĩre yato” yirā, ĩre burocaya. “Rojose tāmũogũ ñari, ĩ jacu manajore ajerio cutibeticōari, Dios ĩ bojarore bajirojua yato” yirā, to bajiro ĩre yiruarāja mua. Tire ĩ yitujajama, mani uju Cristo, masare ĩ ĩabeserirũmu ti ejaro, rojose yir'i ĩ ñaboajaquēne, rojose tāmũotujabetiriaroju ĩ vaborotire ĩre yirētobosarucumi.

⁶ Mua rācagu rojose ĩ yĩñaboajaquēne, “Dios oca masirā ñaja yua” mua yivariquēnase quēnabeaja. Tire bajiro bajiaja pan ũmato vauvase. Mojoroaca vøre ti ñaboajaquēne, vauvajediaja ti. Tire bajirone bajiaja rojose mani yise. Mani rācagu, rojose ĩ yicōa ñajama, ĩ yisere ĩacōari, mani jediro rojose yijedicoanaja. ⁷ Jud'io masa, Pascua boserũmuri quēnorā, pan ũmato vauvasere ĩna reajeorore bajiro rojose mua yisere reajeocōaña mua. “Jediro rojose mua yise yitujacōaña” yigu yaja yu. “Rojose mana ñato mani” yirā, to bajiro yiya mua. Oveja macure bajiro masare Jesucristo ĩ rijabosare suorine rojose mani yise vaja manire ĩ vaja yijeobosare ñajare, to bajiro yiroti ñaja. ⁸ “Rojose mani tāmũoborotire manire yirētobosayumi” yirā, “Yiruarāja” mua yituoĩarore bajirone quēnase rĩne yiroti ñaja.

⁹ Tirũmujũ papera muare cōagũ, ado bajiro gotiboacaju yu: “Gāmerā ajeriarā cutirā rāca ñabesa”, muare yiu-caboacaju yu. ¹⁰ To bajiro yu yijama, “Cristore ajitirũnũmena rāca ñabesa” yigu me yicaju yu. Adigodojũre jājara ñarāma: Manajo mana, manaju mana, manaju cutirā, manajo cutirā quēne, gājerā rāca ajeriarā cutirā ñarāma.

To yicōari, jairo gajeyeūni cūorā ñaboarine, jaibusaro bojarēmōrā ñarāma. Juarudirimasa ñarāma. “Ado bajirā ñarāma” ñna masune yiquēnorujeocōari, rūcubūorā quēne ñarāma. Cristore ajitirūnumenajua jājarā ñna ñajare, ñnare tūoīacōari, “Rudiya” mūare yu yiboajama, no bajiro yicōari, rudimasimenaja mūa. Rijana rīne ñarāma rudirāre bajiro bajirāma. ¹¹ Mūare yu ucacōacatire, “Quēnaro ajimasiato” yigu, ado bajise mūare papera ucacōaja yu quēna: “Ado bajiro bajirāma” yitūoīagū, “Īna rāca ñabesa”, mūare yiuacacōajū: “Cristore ajitirūnurā ñaja yua” yiboarine, gāmerā ajeriarā cūtirā ñarāma. To yicōari, jairo gajeyeūni cūorā ñaboarine, quēna gajeye bojarēmōrā ñarāma. Socarāne gājerāre, “Rojose yima”, yigotirimasa ñarāma. “Ado bajirā ñarāma” ñna masune yiquēnorujeocōari, rūcubūorā ñarāma. Idimecūrā, to yicōari, juarudirimasa quēne ñarāma. “Īna ūna rāca ñabesa” yu yiucajama, ñna rāca mūa babetirotire quēne tūoīagū yaja. ¹²⁻¹³ Cristore ajitirūnumena ñna yisere ĩacōari, “Adi quēnase ñaja; tijua rojose ñaja”, yibeseroti me ñaja manire. Dios sīgūne ñaami to bajise yirocūma. Cristore ajitirūnurā ñaboarine, rojose ñna yisere ĩacōari, “Tire yitūjacōato” yirā, rojose ñnare yiroti ñaja. To bajiri Dios ocare masa ñna ucamasire ti gotirore bajiro yiya mūa. Ado bajiro gotiaja: “Mūa rācagu rojose yigure ‘Yua rāca ñabesa’ ĩre yicōaña”, yigotiaja Dios oca.

6

“Cristore ajitirūnurā rīne, rojose gāmerā mūa yijama, ĩre ajitirūnumena tūju vamenane, mūa masune oca quēnoroti ñaja”, yire queti

¹ Gajeye quēnabeti mūa yisere mūare gotirūaja yu. Cristore ajitirūnurā rīne rojose mūa gāmerā yijama, ĩno yirā oca quēnoruarā, Cristore ajitirūnumena tūju vacōari, oca

quēnorotirūgūati mua? ¿No yirã Cristore ajitirūnūrã rīne rējacōari, ĩnare oca quēnorotibeati mua? “To bajiro bajiaja”, ¿yibojonebeati mua, Cristore ajitirūnumena tujua varuarã? ² “Dios yarã ñari, Cristore ajitirūnumena rojose ĩna yisere ĩabeserona ñaja mani” yimasirã ñaboarine, ¿no yirã ñamasuse mere mua rojose gãmerã yisere oca quēnomasibeati mua? Mua masune oca quēnomasicōarãja. ³ Ángel mesa, vātia, ĩna yisere quēne ĩabeserona ñari, adigodo mua yĩnasere roque rētoro ĩabesemasirãja mua. ⁴ ĩna yisere ĩabeserona ñaboarine, rojose gãmerã mua yisere, Cristore masimenare oca quēnorotirã varūgūaja mua. ⁵ “¿To bajiro yirūgūñujari mani?” mua yimasirotire yigũ, to bajiro muare gotiaja yũ. Tire masicōari, Cristore ajitirūnumenare oca quēnorotibetiruarãja mua yuja. “Masirã ñaja yua” yirã ñaboarine, Cristore ajitirūnumena tujũ mua oca quēnorotirã vajama, “Rojose mani gãmerã yisere mani rãcagũ oca quēnorimasũ magũmi” yirãre bajiro yaja mua. ⁶ To bajiri ado bajiro bajiaja mua: Cojo masare bajiro bajirã ñaboarine, rojose gãmerã yaja mua. To bajiro mua yise quēnabeti ñaja. To yicōari, mua masune oca quēnomenane, Cristore ajitirūnumenajũare mua oca quēnorotirã vase ñaja rētoɓusaro quēnabeti.

⁷ Mua masune rojose mua gãmerã yijare, quēnabeaja. Gãjerã tujũ ĩnare oca quēnorotirã vamenane, ado bajirojua mua yijama, quēnaboroja: Gãji rojose muare ĩ yisere gãmemenane, “Yũare yitocōari, yua ye ñaboasere mu ěmase tone bajicōato. Mũre masirioaja yua” ĩre mua yijama, gãjerã tujũ mua vase rētoro quēnaroja. ⁸ To bajiro ũmato bajiroti ũnirene, ꞑmuajuane ñaja rojose yisurãma! ꞑMuane ñaja gãjerã Cristore ajitirūnūrãre, mua mairona ñaboarãre yitocōari, ĩna yere ěmarã!

⁹ To bajiro rojose mua yisere, “Rojose me ñaja” mua yitũoĩase socase ñaja. To bajiri, to cōrone mua

yirũgũsere yitũjacõañã. “Rojose yirãma, Dios tũju ejarona me ñaama”, yimasiaja mũa. Rojose yirãma, ado bajiro yirã ñarãma: Manajo cõtirã, manajũ cõtirã, manajo mana, manajũ mana quẽne, gãjerã rãca ajeriarã cõtirã ñarãma. “Ado bajirã ñarãma” yiquẽnorujeocõari, rũcũborã ñarãma. ¹⁰ Juarudirimasa ñarãma. Jairo gajeyeũni cõorã ñaboarine, quẽna gajeye bojarẽmorã ñarãma. Idimecũrã ñarãma. Socarãne, “Ado bajise rojose yima”, yigotirimasa ñarãma. Gãjerãre yitocõari, ñna cõoboasere ãmarã ñarãma. “Ïna ùnama, Dios tũju ejarona me ñaama”, yimasirãja mũa. ¹¹ Mũa quẽne ñnare bajiro bajiyuja mũa maji. Yucũrema Jesucristo, to yicõari Esp'iritu Santo sũorine “Rojose mana ñaama yũ yarã” Dios ï yĩarã ñaja mũa.

“Dios ï bojarore bajiro yiroti ñaja”, yire queti

¹² Ado bajiro yisere ajirũgũaja mũa: “Mani bojarore bajiro yimasiaja”, yigotiaja. To bajiro yigotiboajaquẽne, mani tũoĩarore bajiro mani yijama, quẽnabetoja. “Bũto-bũsa Dios ï bojarore bajiro yirã ñato mani” yirã, yibetiroti ñaja manire. “Tire mani yisejacõajama, ti rione manire yirũamacõroja” yirã ñari, yibeticõato mani. ¹³ Gãjerãma, ñna rujũ ti bojarore bajiro yirũarũgũrã ñari, ado bajiro yirũgũama: “Mani gũdajoajũ mani basãroti ñaja bare. To bajicõari, gũdajoajũa quẽne bare basãrotijoa ñaja”, yirũgũama. To bajiro ñna yise, socase me ñaja, bajirojũma. To bajiboarine, mani base, mani gũdajoa quẽne ñamasuse me ñaja. Cojorũmũ tire reajeocõarũcũmi Dios. To bajiri, “Mani rujũ quẽne rõmia rãca ajeriarã cõtiato” yiro me bajaiaja. Cristo ï bojasejũare yirotirujũ ñaja. To bajiri, Cristojũa quẽne, “Yũ bojasere yirã ñaama” yigũ, manire ejarẽmogũmi. ¹⁴ Mani rujũ ti bajiyayiboajaquẽne, mani ùjũ Cristore ï catoriarore bajirone manire quẽne ï masise rãca catorũcũmi Dios.

¹⁵ Cristo yarã ñari, ñre moabosarimasa ñaja mani. To bajiro bajirã ñaboarine, ¿rõmia, ñmũare ajeriarã cõticiõari, vaja sënirã rõmiri rãca ñarãti mũa? ¡Ñabetiruarãja!

¹⁶ “Ína rõmiri rãca mani ajeriarã cõtijama, ñnare ajeriarã cõtirã ñari, cojo rujũne, rujũ cõtirãre bajiro bajirã ñarãja mani”, yimasirãja mũa, Dios ocare masa ñna ucamasire ado bajiro ti gotijare: “Manajo cõtijama, juarã ñaboarine, sigũ rujũre bajiro ñnaama, Dios íajama”, yigotiaja Dios ocare masa ñna ucamasire. ¹⁷ Manajo cõtirere ti gotirore bajirone mani quẽne, Cristore ajitirũnurã ñari, Cristo rãca cojo usũne, usũ cõtirãre bajiro bajiaja mani, Dios í íajama.

¹⁸ To bajiri Cristo yarã ñari, rõmia rãca ajeriarã cõtiruaboarine, yibeticõaña mũa. Gajeye rojose mũa yisema, quẽnacõaroja. To bajiboarine, rõmia rãca mũa ajeriarã cõtisejua ñaja quẽnabeti masu. ¹⁹ Esp'iritu Santore mani usurijure manire cõañumi Dios. To bajiri mani usuriju í ñajare, “Esp'iritu Santo í ñarivire bajiro bajiaja”, yimasirãja mũa. To bajiri mani rujũ, mani masu rujũ me ñaja. Dios ye ñaja. ²⁰ “Yũ yarã ñato” yigũ, Satanás yarã ñaboarãre í macũ í rijare suorine, “Yũ yarã ñnaama”, manire yiyumi Dios. To bajiri rõmia rãca ajeriarã cõtimenane, Dios í bojarore bajiro rĩne yiruãrãja. To bajiro mani yijama, Diore rũcũbũorã yiruãrãja mani.

7

Ína manajo cõtirotire ñna sënĩacõarere Pablo í cãdire queti

¹ Papera rãca yure mũa sënĩacõarere mũare cãdiaja yũ. “Sígũ manajo magũ í ñacõajama, ¿quẽnati?”, yure mũa yisënĩacõarere, “Quẽnaja”, yaja yũ, tire. ² To bajiboarine, “Manajo mana, rõmia rãca ajeriarã cõtire ñna bojajama, manajo cõtiroti ñaja”, yaja yũ. Rõmia quẽne, ñna manaju cõtijama, quẽnaja. ³ Manajo cõticiõari, í yiruaro cõro so

cudijama, quēnaja. Ījua quēne, ī manajo so yiruarō cōro ī cudijama, quēnaja. ⁴ Manajū cuticōari, “Yū bojarore bajiro ĩre yirucōja yū”, yibetirucōcomo. So manajū ī yirore bajiro cudirucōcomo. Ūmū quēne, manajo cuticōari, “Yū bojarore bajiro sore yirucūja yū”, yibetirucūmi. Ī manajo so yirore bajiro cudirucūmi. ⁵ To bajiri, ĩna manajoa rāca ĩna yijama, “Yibesā”, yibeticōato ĩna manajojua. ĩna manajojua quēne, ĩna yirūajama, “Yibesā”, yibeticōato ĩna manajua. To bajiboarine, “Diore rūcuburā, yibeticōato mani maji” ĩna juarājune ĩna yituoījama, quēnaja. Diore rūcubuo gajanocōari, ĩna yirūgūriarore bajiro ĩna yijama, quēnaja. To bajiro ĩna yijama, “Gājerā rāca ajeriarā cutiya”, yimasibetirucūmi vātia ūjū, Satanās.

⁶ Adi jediro mūare yū gotise, mūare rotigū me yaja yū. “Yū gotirore bajirone mūa yijama, quēnaja” yigū, tīre mūare gotiaja yū. ⁷ “Yūre bajiro manajo mana mūa űajama, quēnaboroja”, yituoījaja yūma. To bajiboarine sīgūre bajiro bajirā me űaja mani. Tocārācūre ricati Dios ī masisere manire ūjoyumī.

⁸ Manajo manare, manajū manare, manajū rijaveoriarāre quēne ado bajiro mūare gotiaja yū: Yūre bajiro manajo mana, rōmia quēne manajū mana mūa űacōajama, quēnaja. ⁹ To bajiboarine, manajo magū ĩ ajerio cutirūajama, manajo cutiato. To bajirone yato rōmia quēne. Ajeriarā cutire buto ĩna tuoījama, manajū cutiato.

¹⁰ Manajū cutirāre, ado bajiro mūare gotiaja yū: Mūa manajūare reare maja. Tī űaja mani ūjū ĩ rotire. Yū masu tuoīacōari, yigū me yaja. ¹¹ So manajūre so rocajama, gāji manajū cutire manirūaroja. So manajū űar'i rāca so oca quēnojama, quēnaja. To bajirone bajiaja ūmūre quēne. Ī manajo cutijama, rocare maja.

¹² Mani ūjū yūre ĩ rotire me, yū masune tuoīacōari, ado bajise mūare gotiaja, Cristore ajitirūnūbeco rāca manajo

cutiräre: Mũ manajo Cristore ajitirũnũbeco ñaboarine, mũ rãca so ñacõa ñarũajama, sore rocabetiroti ñaja. ¹³ To bajirone gotiaja manajũ cutiräre quẽne. Mũa manajũa Cristore ajitirũnũmena ñaboarine, mũa rãca ñna ñacõa ñarũajama, ñnare reabetiroti ñaja. ¹⁴ Ado bajiro ti bajijare, tire gotiaja yũ: Mũa manajũa, Cristore ajitirũnũmena ñaboarine, mũa rõmiajũa Cristore ajitirũnũrã mũa ñajare, ñ yaräre ñ ñamaiore bajiro ñnare ñamaiami Dios. To bajirone bajiaja Cristore ajitirũnũmena rõmirire quẽne. Cristore ajitirũnũmena ñna ñaboajaquẽne, mũare ñna manajũa cutijare, ñ yaräre ñ ñamaiore bajiro ñnare ñamaiami. To bajiro ti bajibetijama, mũa rĩare, Cristore ajitirũnũmenare bajiro ñnare ñ ñaborotire ñ yaräre ñ ñamaiore bajiro mũa rĩare quẽne ñnare ñamaiami. ¹⁵ Cristore ajitirũnũgũ manajo Cristore ajitirũnũbeco ñnari, ñre so rocarũajama, rocacõato. To bajirone bajiato rõmiojũare quẽne. Cristore ajitirũnũbecu ñnari, ñ manajore ñ rocarũajama, rocacõato. To bajiro ñna yijama, quẽnacõaroja. Quẽnaro mani ñnase bojaami Dios. ¹⁶ Ado bajiro ti bajijare, to bajise mũare gotibũ yũ: “Cristore ajitirũnũgõ yũ ñajare, yũ manajũ yũ rãca ñ ñacõa ñajama, Cristore ajitirũnũcoarũcmĩ ñ quẽne”, yimasimenaja mũa. Ñmũa quẽne, “Cristore ajitirũnũrã yũa ñajare, yũa manajoa yũa rãca ñna ñacõa ñajama, Cristore ajitirũnũcoarũarãma ñna quẽne”, yimasimenaja mũa, ñna bajirotire masimena ñnari.

¹⁷ To bajiri Cristore ajitirũnũmena ñna bojarore bajiro ñna yicõa ñaboajaquẽne, manijũarema Cristore mani ajitirũnũsuorijũne ricati rĩne mani ñnaretire manire mũjoyumi Dios. To bajiro ñ yire ñajare, manire ñ cũriarore bajirone mani ñacõa ñajama, quẽnaja. To bajiro rĩne gotirũgũaja yũ, tocãrãca macariana Cristore ajitirũnũrãre. ¹⁸ Tire yũ gotijama, ado bajise tuoĩacõari yaja: Cristore mũa ajitirũnũroto rĩjorojũne jud'io masa ñnari, circuncisiõn

yiecoriarã ñañuja mua. To bajiri mua rãcana, “Jud'io masa ñaama' yĩaroma” yirã, circuncisión yiyamanare bajiro ñaruarügürãja mua. Ti ùnire yibeticõaña mua. Mua ñariarore bajiro ñacõaña. Gãjerãma, Cristore mua ajitirũnuroto rĩjorojũne, circuncisión yiecobetiri-arã ñañuja mua, jud'io masa me ñari. Mua rãcana, “Jud'io masare bajiro circuncisión mani yirotijama, quẽ-naroja”, yitũoĩarãma. “Ti ùnire yibeticõato ña”, yaja yũ. ¹⁹ Circuncisión yiecoriarã mani ñajama, mani ña-betijaquẽne, no yibeaja. Dios ĩ bojarore bajiro mani yisejua ñaja ñamasusema. ²⁰ To bajiri “Cristore mani ajitirũnũsorijũne tocãrãcũre Dios manire ĩ cũriarore bajirone mani ñacõa ñajama, quẽnaja”, mũare yaja yũ. ²¹ Cristore mua ajitirũnuroto rĩjorojũne, gãjerãre moabosarimasa ñañuja mua. To bajiri adirũmũrĩre quẽne to bajirone mua moabosacõa ñajama, tũoĩarejaibesa. To bajiboarine, mua ẽjarã, “Mua masune moamasiruarãja” mũare ña yijama, ñare vaveocõari, mua masu mua bojarore bajiro moaruarãja mua. ²² Gãjerãre moabosarimasa ña bojase rĩne yiriarã ñaboarine, Cristore mua ajitirũnũsorijũne, Satanás ĩ bojasere yitũjacõari, Dios yarãjua ñacoasuja mua. Gãjerãre moabosarimasa me ñariarã quẽne, Cristore ña ajitirũnũsorijũne, Cristo yarã ĩ bojasejũare yirã ñacoasuma ña. ²³ “Yũ yarã ñato” yigũ, Satanás yarã mua ñaboarone, ĩ macũ ĩ rĩjare sũorine, “Yũ yarã ñaama”, mũare yiyumi Dios. To bajiri gãjerã, Dios ĩ bojabetire mũare ña yirotisere ñare cudibetiroti ñaja. ²⁴ To bajiri Cristore mani ajitirũnũsorijũne Dios manire ĩ cũrere mani yicõa ñajama, quẽnaja.

²⁵ Gajeye, manajũ mana, manajo mana mua sẽnĩacõarere mũare cudiaja yũ. Mani ẽjũ yũre ĩ yirotere me ñaja ti. Yũ masune tũoĩacõari, mũare gotigũ yaja. Mani ẽjũ, yũre ĩamaicõari, yũre ejarẽmorũgũami,

“Quēnaro riojo tuoīagũ ñato” yigũ. To bajiro yũre ĩ yijare, yũre mua ajitirũñujama, quēnaja. ²⁶ Cristore ajitirũñurã ñari, buto rojose yiecorã ñaja mani. To bajiri, ado bajiro ñaroti ñaja: Manajo mana, to yicõari manajũ mana, mua ñacõajama, quēnaja. ²⁷ Manajoa cutirã, manajũ cutirã quēne, gãmerã reabesa. Manajo mana quēne, manajo macabesa. Manajũ mana quēne, manajũ macabesa. ²⁸ To bajiro yũ gotisere ajiboarine, ĩ manajo cutijama, to yicõari rõmio quēne, so manajũ cutijama, rojose yirã me yirãma ñna. To bajiboarine manajoa cuticõari, rojose ñna tãmũojama, butobũsa josari ñarũaroja ñnare. Tire, butobũsa rojose ñna tãmũosere bojabecu ñari, “Manajũ mana, to yicõari manajo mana mua ñacõajama, quēnaja”, mũare yibũ yũ.

²⁹ Quēnaro tuoĩaña yũ mairã. Ado bajise yigũ, “Mua ñariarore bajirone mua ñacõajama, quēnaroja”, mũare yibũ yũ: Cristo ĩ ejarotirũmũ cõñaro masu bajijaja. To bajiri manajo cutirã, rõmia manajũa cutirã quēne, manajo mana mua ñariarore bajirone ñacõari, Cristo ĩ bojasejũare yĩñarũgũroti ñaja mũare. ³⁰ Sũtiritirã, mua sũtiritisere buto tuoĩabesa. Variquēnarã quēne, mua variquēnasere tuoĩabesa. Gajeyeũni bũjarã quēne, mua mũosere tuoĩabesa. “Adigodojũ yoaro meaca catirũarãja mani” yituoĩarã ñari, to bajiro bajijaja. ³¹ Adigodoaye yoaro me jediroti ti ñajare, buto tire tuoĩabesa. Ñamasuse me ñaja ti. Tire mua tuoĩajama, Cristo ĩ bojasejũare quēnaro yĩmasimenaja mua.

³² Adigodoayerere buto mua tuoĩasere bojabeaja yũ. Manajo magũma, Cristo ĩ bojasejũare buto tuoĩagũmi, ñajediro ĩ yisere ĩ ñavariquēnarotire bojagũ ñari. ³³ To bajiboarine, manajo cutigũma, adigodoayerere buto tuoĩagũmi, ĩ manajo so variquēnarotire bojagũ ñari. ³⁴ To bajiri Cristo ĩ bojasere tuoĩa, to yicõari, ĩ manajo so bojase-

juare quēne tuoīa, yigumi. Juā vāme tuoīare ñaroja ĩre. To bajicōari, manaju magōma, Cristo ĩ bojasejuare buto tuoīagōmo, ñajediro so yisere ĩ ĩavariquēnarotire bojago ñari. To bajiboarine, manaju cutigoma, adigodoayere buto tuoīagōmo, so manaju ĩ variquēnarotire bojago ñari.

³⁵ “Manajo cutiruagu manajo cutibeticōato” yigu me, tire muare gotiaja yu. “Quēnaro tuoīacōari, manajo cutiato ĩna” yigu, tire gotiaja yu. Dios ĩ bojase rīne mua yiñasere bojaja yu.

³⁶ ĩ manajo cutiroco ñario rāca, sore buto bojagu ñari, manajo cutiato. To bajiro ĩ yijama, rojose yigu me yigumi.

³⁷ To bajiboarine, “Manajo cutibetirucuja” yiguma, manajo cutibeticōato. To bajiro bajigu ñari, gājerāre quēne, ĩ ajeriarā cutibetijama, quēnaja. ³⁸ To bajiri ĩ manajo cutiroco ñario rāca, manajo cutiguma, quēnaro yigu, yigumi. “Manajo cutibetirucuja” yigujuama, ĩ rētoro quēnaro yigu, yigumi.

³⁹ Manaju cutigo, so manaju ĩ catiñaro cōro ĩ rāca ñacōa ñaroco ñaamo maji. ĩ rijato beroju, gājire, no so bojagure, mani ujure ajitirūnugūre, manaju cutiruocomo. ⁴⁰ To bajiboarine, “So manaju ĩ rijato bero, gājire so manaju cutibetijama, rētoro quēnaro ñagōmo”, yituoīaja yu. Yu quēne, Esp'iritu Santore cuogu ñaja yu. To bajiri quēnaro tuoīacōari, to bajiro muare gotiaja.

8

“Jesúre ajitirūnurāre ĩnare yirobotiroti ñaja”, yire queti

¹ Quēna gajeye muare gotiguagu yaja yu. Vaibucurāre sīacōari, “Ado bajirā ñarāma” yiquēnorujeoriarā tujure ĩnare rūcubnorā, mojoroaca vaibucu riire cūrūgūama. To yicōari, ruyasere barūgūama. To bajiri, ĩna yisere ĩacōari, “Socarā yama. ĩna rūcubnoboarā manama” yimasirā ñari, “Yuā quēne, yua bajama, quēnacōaja”, yirāja mua. To

bajiro mua yijama, gājerã, “Tire babetiroti ñaja manire” yituoĩaboarãjũare ñare ñamaimenane, “Ĩna rētoro ñamasurã ñaja yua” yirãre bajiro yaja mua. To bajiro yimenane, ado bajirojua yiroti ñaja: “Ĩnare ñamaicõari, ñare ejarēmoroti ñaja, ‘Bũtobusa Diore ajitirũnũato ña’ yirã”. ² Masijeobetiboarine, “Quēnaro masigũ ñaja yu” sīgũ ÿ yiboajama, ruyacõaroja ÿre, quēnaro riojo ÿ masiroti. ³ Diore ÿ maijama, ÿ bojarore bajiro yigu ÿ ñajare, “Quēnaro masigũ ñaami”, ÿre yĩamasigũmi Dios.

⁴ Yirũcũbuoruarã ñna quēnorujeose ñie vaja maja. “Dios sīgũ ñaami, mani rũcũbuogu. Gājerã ÿre bajiro bajirã manama”, yimasijaja mani. ⁵ Gājerã ñna gotijama, “Jãjarã ñarãma mani yirũcũbuorã. Õ vecana, adigodoana quēne ñarãma”, yituoĩaboarãma. ⁶ To bajiro ñna yiboajaquēne, “Dios sīgũne ñaami mani jacu”, yimasijaja mani. Ñne ñaami ñajediro, “Yu bojasere yato ñna” yigu, manire rujeor'i. To bajicõari, Jesucristo sīgũne ñaami mani uju. Jesucristo suorine ñajediro rujeoyumi Dios. To bajiri ÿ sĩaecore suorine Dios yarã ñaja mani.

⁷ To bajiro yirã mani ñaboajaquēne, gājerã ñnaama Cristore ajitirũnrã ñaboarine, mani tuoĩarore bajiro tuoĩamena. Ñna ñnaama, Cristore ñna ajitirũnuroto rĩjoroju, “Ado bajirã ñarãma” ñna masune yiquēnorujeocõari, rũcũbuorũgũriarã. To bajiro yirũgũriarã ñari, ado bajiro tuoĩarãma: “Vaibucurãre sĩacõari, ‘Ado bajirã ñarãma’ yiquēnorujeoriarã tujure ñare rũcũbuorã, mojoroaca vaibucu riire ñna cũsere mani bajama, rojose yirã yaja mani”, yituoĩarãma. ⁸ To bajiro ñna yijama, riojo tuoĩarã me yama. Mani bajama, mani babetijaquēne, ñamasuse me ñaja, Dios ÿ ñajama. “Tire mani babetijama, rētobusaro manire ñavariquēnarucumi Dios”, yire maja. ⁹ “Mani base jediro quēnase rĩne ñacõaja” yirã ñaboarine, babetiruarãja mua. Gājerã Cristore ajitirũnrã, “Ñna basere

mani bajama, ‘Rojose yirã yaja yu’ yituoĩacõari, rojose tãmuotujabetiriaroju vatoma ñna” yirã, tire babetiruarãja muu. ¹⁰ To bajiro yu yijama, ado bajiro yigu yaja yu: “Babetiroti ñaja” gãji ï yisere muu baro ïacõari, “Yu bajama, quẽnabetoja” yituoĩaboarine, bagumi ï quẽne. ¹¹ Cristore ajitirũnurã ñaboarine, muu tuoĩarore bajiro tuoĩamenare quẽne rijabosagu bajiyumi, “Yu rãca quẽnaro ñato” yigu. To bajiri, “Mani base jediro quẽnase rĩne ñacõaja” muu yise suorine muu mairona ñaboarã ñna quẽne ñna bajama, “Rojose yirã yaja yu” yituoĩarã ñari, rojose tãmuotujabetiriaroju vanama. ¹² Muu rãcagu Cristore ajitirũnugũ, “Babetiroti ñaja” ï yĩaboasere muu bajama, rojose ïre yiorã yirãja muu. To bajiro muu yijama, ï sigũrene rojose yirã me, yirãja muu. Cristore quẽne rojose yirã yirãja. ¹³ To bajiri, “Vaibacu rii yu bajama, Cristore ajitirũnugũre rojose ïre yirogure bajiro yigujay yu” yituoĩagũ ñari, baĩobetiroti ñaja.

9

“Jesucristo ï cõar'i me ñaami Pablo” ñna yirere Pablo ï cudire

¹ Yu bojarore bajiro yimasigũ ñaboarine, Jesucristo ï bojasejuare yigu ñaja yu. Jesús, mani ujure ïacacu ñaja yu. Gãjerãre ï cõasuoriarore bajiro yure quẽne cõacami. Yure ï gotiroticõacati suorine ïre ajitirũnurã ñaja muu. ² “Jesucristo ï cõar'i me ñaami Pablo” gãjerã ñna yiboajuquẽne, muajuama, muare yu gotimasiosuocati suorine Cristore ajitirũnurã ñari, “Jesucristo ï cõar'i ñaami”, yiroti ñaja muare.

³ “Jesucristo ï cõar'i me ñaami Pablo” yure yirãre ado bajiro ñnare cudiaja: ⁴ Yu Pablo, to yicõari, Bernabé quẽne, Jesús ï cõacana ñaja yu. To bajiri gãjerã Jesús ï bajirere gotimasiorãre ñna baroti, to yicõari, ñna idirotire muu

ĩsirũgũrore bajirone yũare quẽne ĩsiroti ñaja. ⁵ Pedro, ĩ rãcana quẽne Cristo ĩ gotiroticõariarã, to yicõari, mani mũju Jesús bederã quẽne, Jesúre ajitirũnũrãre manajoa cuticõari, ĩna rãca varũgũama. To bajiro ĩna bajijare, ĩna manajoare quẽnaro codebosarũgũaja mũa. To bajiri “Yũa quẽne, manajo cuticõari, vamasirãja”, yitũoĩaja yũa. ⁶ Jesús ĩ bajirere gotimasiodirimasa gajeye moare moamenane, “Quẽnaro yũare gotimasioato” yirã, ĩnare mũa ejarẽmoriarore bajiro yimenane, “Ĩna masune moacõari, vaja yato ĩna ñarotire”, ¿yitũoĩati mũa, yũarema? ⁷ Surara mesa quẽne, ĩna moare rĩne moarãma. “Ĩna moare ĩna moajama, ĩna ñaroti vaja ĩsiecõuarãma”, yimasire ñaja. Hye oterimasũma, “Tire barũcũmi”, yimasire ñaja. Cabrare coderimasũ quẽne, “Ĩna õjecoa idirũcũmi”, yimasire ñaja. ⁸ To bajiri, “Mani moase sũorine quẽnase bũjaroti ñaja”, yimasire ñaja. To bajiri, Dios ocare masa ĩna ucamasire quẽne, tire bajiro gotiaja. ⁹⁻¹⁰ Ado bajiro gotiaja Moisés ñamasir'ire Dios ĩ roticũmasire: “Ta vecũ risere siabibebesa, trigo gasere ĩre mũa cũda jãnerotijama, ‘Ĩ quẽne bato’ yirã”, yigotiaja. To bajiro ĩ gotijama, ta vecũa rĩrene tuoĩagũ me yimasiñumi Dios. Mani jedirore tũoĩacõari, yigũ, yimasiñumi. Vese moarã, to yicõari, gãjerã ĩna otere rica juarãre quẽne, “ ‘Mani moase sũorine quẽnase bũjarũarãja’ yimasiato” yigũ, tire yimasiñumi Dios. ¹¹ Jesús ĩ bajirere mũare gotimasiosũocajũ yũa, “To bajiro mani yise sũorine Cristore ajitirũnũrũarãma sĩgũri” yirã. Mũare yũa gotimasiojama, ote ajere oterãre bajiro mũare yicajũ yũa. To bajiri yũa gotimasiodati sũorine Cristore ajitirũnũrã ñari, yũa otecatiricare bajiro bajirã ñaja mũa. To bajiro bajirã mũa ñajare, yũa gotimasiodati vaja, mũare yũa sẽnijama, ¿vaja yiroti me ñaboayujarique? ¹² Gãjerã Cristo ĩ bajirere ĩna gotimasiojare, ĩnare vaja yirũgũrãja mũa. To bajiri, mũare gotimasiosũocanare

roque, ġinare mña ĩsiro rĕtoro yuare vaja yiroti me ña-tique?

To bajiro yiroti ti ñaboajaquĕne, mñare vaja sĕnibeticaju ya. Buto josari ya moarũgũcati ti ñaboajaquĕne, “Yuare ejarĕmoña”, mñare yibeticaju ya, “ ‘Gãjoa bo-jarã, Jesús ĩ bajirere gotimasioama’ manire yiroma” yirã. ¹³ Diore yirũcũbũoriavijũ ĩre rũcũbũorã, bare ĩna cũsere ti vi moarimasa ñari, ĩna baroto cõro juacõari, barũgũama. Tire masiaja mña. ¹⁴ “Tire bajirone bajirũaroja yũ ocare gotimasiodirimasare quĕne. ĩna gotimasiose vajane bacatirũarãma”, yiyumi mani uju Cristo. ¹⁵ To bajiro ĩ yirere masigũ ñaboarine, mñare vaja sĕnibeticaju ya. Sĕnibeticacũ ñari, “Yucũju yũre vaja yiya” mñare yũcagũ me yaja yũ. Buto ñiorijagũ ñaboarine, mñare bare sĕnibecũ rĩne, rijacoarũcũja yũ. To bajiri, Jesucristo ĩ bajirere yũ gotimasiodijama, vaja sĕnibetirũgũaja. “ ‘Vaja taami Pablo’ gãjerã ĩna yisere bojabecũ ñari, vaja sĕnibeticaju”, yivariquĕnaja yũ.

¹⁶ Cristo ĩ bajirere gotimasioğũ ñari, “Ñamasugũ ñaja yũ”, yitũoĩabetirũgũaja. Jesucristo yũre ĩ gotiroticati ñaja yũ moare. Tire yũ gotimasiobetijama, rojose tãtũobogũja. ¹⁷ Jesucristo yũre ĩ gotimasiorotibetone, yũ masu “ĩ ocare gotimasiodirũcũja” yũ yijama, “Yũ gotimasiose vaja, quĕnase bũjarũcũja”, yitũoĩabogũja yũ. To bajiboarine, Jesucristo yũre gotimasioroticõacami. To bajiri quĕnase yũ bũjajama, yũ bũjabetijaquĕne, no yibeaja ti. ĩ ocare gotimasiodõa ñaroti ñaja yũre. ¹⁸ To bajiro ti bajijare, vaja sĕnibecũne, Jesucristo ĩ bajirere gotimasio variquĕnarũgũaja yũ, vaja sĕniroti ti ñaboajaquĕne.

¹⁹ To bajiri yũ gotimasiose vaja, yũre vaja yimena ñari, rotimasibeama masa. Yũre ĩna rotimasibetiboa-jaquĕne, “Jãjarãbusa Cristore ajitirũnũato” yigũ, ĩna ĩavariquĕnarore bajiro bajiñarũgũaja yũ. ²⁰ Jud'io masa

tujū yū ñajama, Cristore ñna ajitirūnurotire bojagu ñari, ñnare bajiro bajiñaja yū quēne. To bajiro yū yijama, ado bajise yigu yaja yū: Moisére Dios í roticūmasirere ajirūcubhorā tujū yū ñajama, “Cristore ajitirūnūato” yigu, ñna yirūcubhorore bajiro yirūgūaja. “Tire quēnaro mani ajirūcubhojama, manire ñavariquēnarucūmi Dios” ñna yituoīarore bajiro tuoīagū me ñaboarine, to bajiro yirūgūaja yū. ²¹ Jud'io masa me ñarā tujū yū ñajama, “Cristo ocare yū gotimasiosere ajitirūnūato” yigu, ñna ñasere bajiro ñacōari, ñnare gotimasiorūgūaja. To bajiro yū bajijama, Dios í bojabetire yigu me bajijaja. Jesucristore ajitirūnucōa ñarūgūaja yū. ²² “Manire ejarēmorucūmi Cristo” yituoīaboarine, tuoīagūirā tujū yū ñajama, ñnare bajiro bajiñaja yū quēne, “Yū gotisere ajivariquēnacōari, butobusa Cristo ocare ajitirūnūato” yigu. “Sīgūri yū gotimasiosere ajicōari, Cristore ajitirūnūato” yigu, yū yimasiro cōro yirūgūaja yū. ²³ “Cristore mūa ajitirūnūajama, rojose tāmūotujabetiriaroju mūa vaborotire mūare yirētobosarucūmi’ yire quetire ajijedicōato masa” yigu, to bajiro yirūgūaja. To bajiri, “Gājerā Cristore ajitirūnūrāre Dios quēnaro í yirotere bajiro yūre quēne quēnaro yato” yigu, to bajiro yirūgūaja yū.

²⁴ Cristore ajitirūnūrā, Dios quēnaro manire í yirotere mani bojajama, josari yirūgūroti ñaja. Ūmatīmarā cōro buto ñna ūmaboajaquēne, sīgū ñagūmi ñna rētoro ūmacōari, quēnase būjarocu. To bajiri mani quēne, gājerā rētoro ūmagūre bajiro mani yimasiro cōro yirūgūroti ñaja, quēnase mani yise vaja, Dios quēnaro manire í yirotere bojarā ñari. ²⁵ To bajiri, í ūmaroto rījorojune quēnaro ñayucōagūmi. To bajiro í bajijama, yoaro mene rojoribedo ti ñaboajaquēne, “Gājerāre ūmarētocōari, būjagusa” yigune bajicōagūmi. To bajiro í bajijosase ūnire yirāne, Cristore ajitirūnūrā quēne í bojarore bajiro mani

yisere ñacõari, yayiroti mejuare manire ï ïsirotire bojarã, quẽnaro yirũgũaja mani. ²⁶ Quẽnase mani bũjaroti, yayiroti me ti ñajare, yu yimasiro cõrone Dios ï bojarore bajiro yiñarũgũaja yu. Ũmagũ ï ũmagajanorotiju rĩne tuoĩacõari ũmagũmi. Ìre bajiro bajaia yu quẽne, Dios quẽnaro yure ï yiotire bojatuoĩagũ ñari, ï bojarore bajiro yiñarũgũaja yu. Quẽarimasu ñaboarine, quẽnaro ñose ejobecumi. Yũjuama, quẽnaro ñose ejogure bajiro bajigu ñari, Dios quẽnaro yure ï yiroti rĩrene tuoĩagũ, Dios ï bojarore bajiro yirũgũaja yu. ²⁷ To bajiri, yu gotimasiorãre quẽnaro Dios ï yiotire yu gotiboajaquẽne, “Rojose yure yiromi” yigu, yu bojasere yiruaboarine, ï bojasejuare yirũgũaja.

10

“Rũcũbuoguarã ñna quẽnorujeoriarãre rũcũbuobesa”, yire

¹ Adire masiritibesa mua: Jud'io masa yua ñicua, Moisés ñamasir'ire sũyamasiriarã ñna bajimasirere masiritibesa. “Egiptoana ñnare sãabeticõato” yigu, Dios ï masise rãca buerine yua ñicua buebibecõamasiñuju. To ï yijare, jediro jẽacoamasiñujarã riaga, Oco Sũarisa vãme cutiya, gajejacatujũ ñnare rudirã. ² To bajiro ñna bajijama, “Moisére ajitirũnurã ñaja yua” yĩorã bajimasiñujarã ñna. ³ Ñna jẽaro bero, ñna jediro õ vecaye maná vãme cuti Dios ï cõarere barũgũmasiñujarã. ⁴ To yicõari, ñna idicatitrotire yigu, gũtajure oco budirotimasiñuju Dios. Ti oco ñna idise quẽnase ñamasiñuju. Jesucristo quẽne, gũtare bajiro ñagũ quẽnasere cõagũ ñacoayumi. To bajicõari, gũta suorine ñna catijama, Cristo, ruyubeti-boarine, ñnare ï ñatirũnũjare, ñna jedirone quẽnaro ñacoayuma. ⁵ Quẽnaro ñnare ï ñatirũnũboarone, jãjarã rojose ñna yijare, ñnare ñavariquẽnabetimasiñuju Dios. To bajiro

ĩna yisere ĩavariquẽnabecũ ñari, “Ujorũcũja” ĩnare ĩ yiboaria sitajũ ĩna ejabetone, “Yucũ manojũne bajireacõaña mũa”, ĩnare yimasĩũju Dios.

⁶ To bajiro ĩna bajimasire ñajare, “Dios ĩ bojabetire mani yijama, ĩnare ĩ yimasiriarore bajiro manire quẽne yiromi Dios” yimasirã ñari, mani yibetijama, quẽnaja. ⁷ To bajiri yũa ñicũa sĩgũri, “Ado bajigu ñagũmi” yiquẽnorujeocõari, ĩna rũcũbuomasiriarore bajiro rũcũbuobesa mũa. Yũa ñicũa, ĩna rũcũbuomasirere ado bajiro gotiaja Dios ocare Moisés ĩ ucamasire: “ ‘Ado bajigu ñagũmi’ yiquẽnorujeocõari, ‘İre rũcũbuorã yaja’ yirã, barujiyuma. To yicõari, idiyuma. To yigajanocõari, basavariquẽnacama”, yigotiaja Dios ocare Moisés ĩ ucamasire, Dios ĩ bojabetire ĩna yimasirere gotiro. ⁸ To yicõari, gajeye yũa ñicũa sĩgũri, rõmia rãca gãmerã ĩna ajeriarã cutimasire ũnire yibetiroti ñaja manire. To bajiro ĩna yijaise vaja, cojorũmune veintitres mil ñarãre bajirearotimasĩũju Dios. To bajiri ĩnare ĩ yimasiriarore bajiro, “Manire quẽne yiromi” yirã, yibetiroti ñaja. ⁹ “Rojose mani yijama, rojose manire yirũcũmi” yitũoĩaboarine, rojose yitujamena ñari, ãña cũnieco, bajireacoamasiũjuarã ĩna. To bajiri, “Rojose tãmuorobe” yirã, ĩna yimasiriarore bajiro yibetiroti ñaja manire. ¹⁰ Yũa ñicũa sĩgũri Diore ñagõmacamasiũjuarã. To bajiro ĩna yise sũorine ĩ tũagũre ĩnare sãarearotĩcõamasiũju Dios. To bajiri ángeljũa ĩnare sãareacõamasiũju. “Manire quẽne to bajiro yirotiromi Dios” yirã, ĩre ñagõmacabetiroti ñaja.

¹¹ “To bajise rojose yũa ñicũa ĩna yimasiriarore bajiro mani yijama, ĩnare ti bajimasiriarore bajiro bajirũaroja manire quẽne”, yimasiaja mani. Adirodori-ana, mani tũoĩamasirotire yigu, ĩna bajimasirere Moisére ucarotimasĩũmi Dios. ¹² To bajiri, Cristore quẽnaro ajitirũnũgũma, quẽnaro tũoĩamasiri ñato, “Jud'io

mena, ñna quēnorujeoriarãre ñna rŭcubuoajama, vãtiajuaare rŭcubuoarã yirãma. To bajiri, vãtiare mua ejarēmosere, to yicōari, vãtiajua quēne, ñnare mua ajitirŭnrotire yirã, muaare ñna ejarēmorotire bojabeaja yu. ²¹ To bajiri mani ũjare rŭcubuoōa, vãtiare quēne rŭcubuo mani yijama, quēnabetoja. To bajiro yibetiroti ñaja manire.

²² To bajiro mani yijama, ñajŭnisinirucumi mani ũju. Ñ rētoro masirã me ñaja mani. To bajiri, “Rojose mani yise vaja, rojose ñ yijama, rudimasibetiruarãja mani”, yimasiaja.

“Mani ñaroti rñe tuoïaroti me ñaja”, yire queti

²³ Ado bajiro yisere ajirŭgŭaja mua: “Mani bojarore bajiro yimasiaja”, yigotiaja. To bajirone bajaiaja, bajirojuma. Jediro mani yise manire ejarēmobeaja. To bajiro mani yijama, “Gãjerã, Dios ñ bojarore bajiro yirã ñato” yirã me, yirãja mani. ²⁴ Mani masu quēnaro mani ñaroti rñe tuoïaroti me ñaja. Gãjerã quēnaro ñna ñarotire quēne tuoïarŭgŭuarãja mani.

²⁵ Vaibucu rii ñna ñsiriju ñasere vaja yicōari, “Rojose ñaroja” yituoïamenane, mua bajama, quēnaja. “¿Ñna quēnorujeor'ire rŭcubuoarã ñna cŭruare ñati adi?”, yisēniĩabeja. Dios ocare masa ñna ucamasire ado bajiro ti gotijare, “Sēniĩabetiroti ñaja”, muaare yaja yu: ²⁶ Adi macarucuroaye jediro Dios ñ rujeore ti ñajare, bare ñaro cōrone mani bajama, quēnaja.

²⁷ Cristore ajitirŭnubecu, “Yu tu barã vayá” yicōari, no bojase ñ ecasere mua bajama, quēnaja. “¿Ñna quēnorujeor'ire rŭcubuoarã vaibucu rii ñna cŭruare ñati adi?” yisēniĩamenane, mua bajama, quēnaja. ²⁸⁻³⁰ “Tire mani bajama, quēnaja” mua yituoïajama, gãji magŭmi, “Rojose yirã yaja mua” yigu. Ñna quēnorujeor'i taju ñna cŭruare riire, “Quēnaja” Diore mua yisēniro bero mua bajama, rojose yirã me yirãja mua. To bajiboarine,

Cristore ajitirūnugū, “Īna quēnorujeor'i tujū ĩna cūruare rii űaja, mani babeti” ĩ yigotijama, babeja. ³¹ To bajiri mani bajama, mani babetijaquēne, mani idijama, mani idibetijaquēne, no bojase mani yijama, Dios ĩ bojarore bajiro yiruarāja mani, ĩre rūcubworā. ³² Gājerāre ĩa-maimenane mani bojarore bajiro mani yisere ĩacōari, “Īna quēne rojose yiroma” yirā, yibetiroti űaja. ³³ Tire muare yu gotirore bajiro yirūgūaja yu. To bajiro yigu űari, yu masu yu bojasere yibecune, yu rācana jediro ĩnare yu ejarēmorotijuare tuoĩacōari, yirūgūaja yu, “Yu yise suorine Cristore ajitirūnucōari, rojose tāmuetujabeti-aroju ĩ yirētobosarā űato” yigu.

11

¹ To bajiri, “Cristo ĩ bajiñariarore bajiro yiroti űaja” yituoĩacōari, yu yimasiro cōro yirūgūaja yu. To bajiri mua quēne, yu bajiñarūgūsere tuoĩacōari, mua yimasiro cōro yirūgūroti űaja.

Rējariaviju Diore sēnirā, ĩ ocare gotirā, rōmia ĩna bajiroti queti

² “Jediro yu gotimasiocatire masiritimenane, ajitirūnucōa űarāja mua”, yivariquēnaja yu. ³ To bajiro yigu űaboarine, gajeye muare gotimasioaja yu. Rējacōari, Diore mua rūcubwose, “Ado bajirojua yiroti űaja”, muare yigotigu yaja yu: Tocārācure rotigu űari, mani rujoare bajiro bajiami Cristo. To bajirone bajiaja rōmia manajua cutirāre. ĩna manajua, ĩna rujoare bajiro bajirā űarāma, ĩnare rotirā űari. To bajirone bajiaja Cristore quēne. ĩ jacu, ĩ rujoare bajiro bajigumi, ĩre rotigu űari. ⁴ To bajiro ti bajijare, rējariaviju, rujoa jeoriarori jeocōari, Diore ĩna sēnijama, Dios oca ĩna gotijaquēne, Cristore rūcubwomena yirāma. ⁵ Rōmiajuama, ĩna rujoa jeoriarori jeomenane Diore ĩna sēnijama, Dios oca ĩna gotijaquēne,

ĩna manajũre rũcubũomena yirãma. Ĩna rujoa jeoriarori ĩna jeobetijama, joa suagoriarãre bajiro bajirã ñarãma, ĩnare rũcubũomena ñari. ⁶ To bajiro ti bajijare, “Rõmia manajũa cutirã ĩna rujoa jeoriarorire ĩna jeorũabetijama, ĩna joare suagoroti ñaja”, mũare yaja yũ. To bajiro yũ yijama, “Bojoneose ti ñajare, rujoa jeoriarorire jeoato” yigũ yaja. ⁷ To bajiri mũma, Diore ĩna sãnijama, ĩ ocare ĩna gotijaquẽne, rujoa jeoriarorire jeobetiroti ñaja, “Yũre rotibosacõari, yũre rũcubũoato” yigũ, Dios ĩ rujeoriarã ñari. Rõmiajuama, “Õmũare rũcubũoato” yigũ, Dios ĩ rujeorio ñaamo. ⁸ Rõmio gõarore ãmicõari, mũmũre rujeobesumi Dios. Õmũ gõarojuare ãmicõari, rõmiore rujeomasĩnumi Dios. ⁹ “Rõmiore ejarẽmoato” yigũ me, mũmũre rujeomasĩnumi Dios. Rõmiojuã, mũmũre ejarẽmoato yigũ, rujeomasĩnumi. ¹⁰ To bajiro bajimasire ti ñajare, ĩna manajuare rũcubũorã, rujoa jeoriarori ĩna jeojama, quẽnaja. To bajiro ĩna yijama, “Dios ĩ bojarore bajiro yama, ĩna manajuare rũcubũorã”, yĩfavariquẽnaruarãma ángel mesa. ¹¹ Õmũare quẽne, rõmiare quẽne rujeoyumi Dios. Rõmia ĩna manijama, quẽnaro ñamasimenama mũma. Rõmia quẽne, mũma ĩna manijama, quẽnaro ñamasimenama. ¹² Õmũ gõarone rõmiore Dios ĩ rujeomasirio so ñaboajaquẽne, mũma, rõmia suorine ĩna ruyuase ti ñajare, “Gãmerã ejarẽmoroti ñaja”, yaja mani. To bajicõari, mani jediro ñaja Dios ĩ rujeoriarã.

¹³ Mũa masune quẽnaro tũoĩamasiña. “Rẽjariavijũ Diore sãnirã, ĩ ocare gotirã quẽne, rujoa jeoriarori jeomenane rõmia ĩna yĩñajama, quẽnabeaja”, yimasirãja mũa. ¹⁴ “Õmũa yoese ĩna joa cutijama, bojoneose ñaja”, yitũoĩaja mani. ¹⁵ Rõmiajuarema, “Yoese joa cutirã ñaama”, yitũoĩaja mani. “Ĩna joa ĩna rujoarire buase ñato” yigũ, Dios ĩ cũmasire ñajare, to bajiro tũoĩaja mani,

rōmiare. To bajiri yoese ĩna joa cõtijama, variquēnaama rōmia. ¹⁶ Sīgũri to bajiro mũare yũ gotisere ajicōari, “To bajiro me bajiaja” ĩna yijama, “Ñajediroana Cristore ajitirũnrãre, to bajise rĩne gotirũgũaja yũa, mũare yũ gotiri vãmere”, ĩnare yigotiroti ñaja.

Cristo ĩ batũsare boserũmũre bañarã ĩna rũcũbuobetire queti

¹⁷ Rējacōari, mũa basere tũoĩavariquēnabeaja yũ. “Rējacōari bato mani” mũa yibetijama, quēnacōaboriaroja. ¹⁸ “Rējaboarine, ricati rĩne tũoĩarã ñari, ricatitubuari rujicōari, gãjerã rãca oca josaama”, yire queti ajiaja yũ, mũare. Ado bajiro tũoĩarã mũa ñajare, “To bajirone bajirãma”, mũare yaja yũa: ¹⁹ “Mani tũoĩarore bajiro tũoĩarã rãca mani rujijama, ĩna ñaama Dios oca quēnaro masirã’ manire yirũarãma”, yitũoĩarãja mũa. ²⁰ Ricati rĩne tũoĩarã ñari, “Cristo ĩ batũsarere tũoĩacōari bato mani” mũa yiboase, Cristore rũcũbuomena yirãja. ²¹ Mũa juavarere gãjerãre yumenane, bajeocōarãja mũa. To bajiri jairo barã, to yicōari, idimecũrã mũa ñaboajaquēne, mũa bero ejarã sīgũri bare mana ñari, ñiorijacōa ñarãma. To bajiro yirã ñari, cojo masare bajiro bajirã ñaboarine, mũa bero ejarã rãca baba cõtimasĩna manoja mũare. ²² Viri cõtirã ñarãja mũa. Mũa ya virijũne bare ba, idi, mũa yijama, quēnaja. To bajiro mũa yibetijama, gãjerã bare cũomenare rojose yĩorã yirãja mũa. Gãjerã Cristore ajitirũnrãre ĩaterã ñari, ¿to bajiro yatique mũa? “Bare cũomenare quēnaro yaja mũa’ yato Pablo”, ¿yitũoĩaboati mũa? Yibeaja yũ. To bajiro mũa yijama, rojose masu yirã yirãja mũa.

Mani Ƴũ ĩ rijaroto rĩjoro ĩ batũsare queti
(Mt 26.26-29; Mr 14.22-25; Lc 22.14-20; Lc 4.1-7)

²³⁻²⁴ Adi mware yu gotimasiose, mani ujū ĩ rijaroto rĭjoro ĩ batũsare queti ñaja. Yũre ĩ goticati, to yicõari, mware yu gotirõtocati ñaja. Ado bajiro bajaia: Mani ujũre Judas ĩre ĩ ĩsirocaroto rĭjoro, panre āmicõari, “Quẽnaja”, Diore yisēniñuju Jesús. To yigajano, panre mutocõari, ĩ buerimasare ĩsibatogũne, ado bajise gotiyuju ĩ: “Ti ñaja yu rujuri. Mware rijabosarũcũja yu. Yu rijato bero, mware yu rijabosare tuoĩacõari, yũre rũcũbuorã, ado bajirone rějacõari, barũgũrũarãja”, ĩnare yigotiyuju. ²⁵ To yicõari, bare ĩna baro bero, uye oco sãñaribajare āmicõari, ado bajiro gotiyuju Jesús quẽna: “Adi ñaja tirũmũana, ‘Rojose mani yirere masirioato’ yirã, Diore rũcũbuoriaju joere ĩna yuejeoriarore bajiro bajise. Yucũrema, yu ri'i ñaja. Ti sũorine, ‘Gajerodori ado bajiro masare quẽnaro yirũcũja yu’ Dios ĩ yigotimasiriarore bajiro bajirũaroja. Yu rijato bero, mware yu rijabosare tuoĩacõari, yũre rũcũbuorã, ado bajirone rějacõari, idirũgũrũarãja”, ĩnare yiyuju Jesús. ²⁶ ĩ rotiriarore bajirone mani bajama, mani idijaquẽne, yĩorũgũroti ñaja, “Manire rijabosayumi mani ujũ” yirã. ĩ tudiejarojũ to bajiro yitũjarũarãja mani.

²⁷ To bajiri, mani ujũ manire ĩ rijabosarere tuoĩagũ, panre ba, to yicõari, uye ocore idi, yiboarine, rũcũbuobeti rãca ĩ yijama, Cristore rũcũbuobecu yigũmi. “Cristo ri'i, ĩ rujuri quẽne, ñie vaja mani ñaja” yigũ yigũmi. ²⁸ To bajiri panre mani baroto rĭjoro, to yicõari, uye ocore mani idiroto rĭjoro, rojose mani yirere tuoĩa, Diore yigoticõari, panre ba, uye ocore idi, yiroti ñaja. ²⁹ To bajiro yibecũrema, Cristo manire ĩ rijabosare quẽnaro ĩ tuoĩabetijare, rojose ĩre yirũcũmi Dios. ³⁰ To bajiro ti bajijare, jãjarã ñarãja mũa rijaye cutirã. Gãjerãma, bajireacoana, bajireamena quẽne ñarãja mũa. ³¹ Cristo manire ĩ rijabosarere quẽnaro tuoĩacõari, to yicõari, rojose mani yirere tuoĩa, Diore mani yigotijama, rojose

manire yibetirucumi Dios. ³² Rojose mani yise suorì rojose Dios manire ì yijama, “Rojose yitujacõari, yure ajimena rãca rojose tãmuotujabetiriaroju vabetiruarãma” yigũ yigũmi.

³³ To bajiri yũ mairã, mani uju manire ì rijabosare tuoĩacõari panre barã, to yicõari uye ocore idirã mua rējajama, gãjerãre yucõari, ìna ejajediro baba. ³⁴ Mua rējaroto rĩjoro, mua ñiorijajama, mua ya viriju mua bajama, quēnacõaroja. To bajiro mua yijama, no yigũ rojose muare yibecumi Dios.

Mua tũju ejacõari, gajeye quēnaro muare gotirucuja yũ.

12

“Yũ ujose rãca gãmerã ejarēmomasiato” yigũ, Esp'iritu Santo manire ì yire queti

¹ Yũ mairã, gajeye Esp'iritu Santo ì masise manire ì ujosere gotigũagũ yaja yũ, “Masiato” yigũ.

² Diore mua ajirũcũbuoroto rĩjoro, muare yitorimi vãtia uju, Satanás. To ì yijare, “Ado bajirã ñarãma” ìna masune yituoĩa quēnorujeocõari, ñagõmena ìna ñaboajaquēne, “Rētoro masirã ñarãma” socarãne yirũcũbuorã ñañuja mua maji. ³ To bajiri, ado bajise mua masisere bojaja yũ: Esp'iritu Santo rãca ñagũma, “Rojose tãmuotujabetiriaroju Jesúre cõaroti ñaja”, yibecu ñagũmi. To bajicõari, “Mani uju, Jesúre, Dione ñagũmi” yigũma, Esp'iritu Santo ì ejarēmose rãca tire yigũmi.

⁴ “Dios ì bojarore bajiro yimasiato” yigũ, ì masisere manire ujoyumi Esp'iritu Santo. Ì sīgũne manire ujør'i ì ñaboajaquēne, tocãrãcũre ricati rĩne mani yimasitotire manire ujoyumi. ⁵ Dios ì bojasere yirã, ricati rĩne mani yimasise ti ñaboajaquēne, sīgũne ñaami mani uju. ⁶ Ricati rĩne manire ì ejarēmose ti ñaboajaquēne, sīgũne ñaami manire ejarēmogũma. ⁷ Ado cõrone Esp'iritu Santo

manire ĩ ʋjosere mʋare gotigu yaja: Tocārācure Esp'iritu Santo ĩ ñajama, “Gājerāre ejarēmomasiato” yigu, ĩ masisere ʋjogumi. “Esp'iritu Santo ĩ ʋjor'i ñari, to bajiro yami”, yimasire ñaja. ⁸ “Quēnaro tuoĩacōari gotimasioġũ ñato” yigu, ĩ yimasirotire ĩre ʋjogumi. Gājirema, “Dios ocare quēnaro ajimasicōari, ĩnare gotimasioġũ ñato” yigu, ĩ yimasirotire ĩre ʋjogumi. ⁹ Gājirema, “Dios ĩ masise rāca yure ejarēmorucumi” ĩ yituoĩarotire ĩre ʋjogumi. Gājirema, rijaye cutirāre ĩ catiorotire ĩre ʋjogumi. ¹⁰ Gājirema, ĩaĩañamani ĩ yĩiorotire ĩre ʋjogumi. Gājirema, “ĩre yʋ gotisere ajicōari, yure gotirētosarimasʋ ñato” yigu, ĩ yimasirotire ĩre ʋjogumi. Gājirema, gājerā ĩna gotisere ajicōari, “Esp'iritu Santo ĩ ejarēmojare, ĩnare gotiama; vātijʋa ĩ ejarēmojare, ĩnare gotiama” ĩ yimasirotire ĩre ʋjogumi. Gājirema, gājerā oca masibecu ñaboarine, ĩ ñagōmasirotire ĩre ʋjogumi. Gājirema, “Ti ocare buebecʋ ñaboarine, ajimasicōari, gotirētogũ ñato” yigu, ĩ yimasirotire ĩre ʋjogumi. ¹¹ Ricati rĩne tocārācure ĩ bojarore bajiro ĩna yimasirotire ĩnare ʋjogumi.

“Cojo rujʋ ñaboarine, mani rujure jairo ñabateaja”, yire queti

¹² Mani rujure jairo ñabateaja, cojo rujʋ ñaboarine. To bajirone bajiaja mani Cristore ajitirũnrā quēne. ¹³ Jediro ñaja mani. Jud'io masa, jud'io masa me ñarā quēne ñaja mani. Sġgũri gājerāre moabosarā, gājerāma, moabosamena ñaja mani. Mani jedirore oco rāca mani bautiza ecorone, manire ejayumi Esp'iritu Santo. To bajiri Esp'iritu Santo suorine Cristo yarā, cojo masare bajiro ñaejayuja mani.

¹⁴ Mani rujʋ, cojo rujʋ ñaboarine, jairo vāme cutibatoaja. ¹⁵ Mani rujure, ġʋbo ti tuoĩajama, “Āmo me ñaja yʋ. To bajiri, rujʋaye me ñaja” ti yiboajaquēne, rujʋayene ñacōa ñaroja. ¹⁶ Gāmoro ti tuoĩajama, “Cajea me ñaja

yũ. To bajiri, rujuaye me ñaja” ti yiboajaquẽne, rujuayene ñacõa ñaroja. Tire bajirone bajiaja mani quẽne. Sígũ, Cristore ajitirũnũgũ, gãjire ñacõari, “Ïre bajiro yimasigũ me ñaja yũ. To bajiri Cristo yũ me ñagũja yũ” ï yiboajaquẽne, Cristo yũne ñacõa ñagũmi. ¹⁷ Mani ruju ñaro cõrone, cajea rĩne ti ñacõajama, ¿no bajiro ajimasirãda mani? Mani ruju ñaro cõrone, gãmoro rĩne ti ñacõajama, ¿no bajiro vĩnimasirãda mani? Tire bajirone bajiaja Cristore ajitirũnrãre quẽne. Ïre ajitirũnrã jediro, cojo vãme rĩne quẽnaro yimasirã mani ñajama, gaje vãme Dios ï bojasere yimasimena ñaborãja mani. ¹⁸ To bajiri, Dios, manire rujeosũogujũne, mani ruju ñasere, “Adijũne ti ñajama, quẽnaja” yigũ, mani rujuayere rujeoyumi. To bajiri, mani ruju, cojo ruju ñaboarine, ricati rĩne ti ñabaterore bajirone bajiaja Cristore ajitirũnrãre quẽne. ¹⁹ Mani rujuaye, cojojũne jairijũro ti ñajedicoajama, rujujũama nojũa ñabetoja. ²⁰ To bajiri mani rujuaye jairo ñabateboarine, cojo rujuene ñaja.

²¹ To bajiro ti bajijare, mani cajea ti yijama, “Ñie vaja maja ãmo”, yimasibetoja. Mani rujoa quẽne, “Ñie vaja maja gũbori”, yimasibetoja. Ñajedirone manire ejarẽmoaja. Tire bajiro bajiaja Cristore ajitirũnrãre quẽne. Cristore ajitirũnũgũ, gãjire ñacõari, “Yũre bajiro yimasigũ me ñaami. Vaja magũ ñaami”, yibetiroti ñaja. ²² Ado bajirojũa bajiaja: Mani ruju ñasere, “Adijũma ñamasuse me ñaja” mani yitũõaboasene ñaja ñamasuse. ²³⁻²⁴ Mani ruju ñasere jediro toobetiboarine, “Ñamasuse me ñaja” mani yisere, “Gãjerã ñaroma” yirã, sudine sãñatoorũgũaja mani. To bajiro mani yijama, mani ñorijũ rẽtoro tijauẽ mairãre bajiro yirã yaja. “To bajirone bajiato” yigũ, to bajise manire rujeoyumi Dios. ²⁵ Mani ruju jairo ñabateboarine, cojoro cõro ñamasuse ñaja. Mani Jesũre ajitirũnrã quẽne, to bajirone bajirã ñaja. Jãjarã

ñaboarine, ñamasurã rĩne ñaja mani. To bajiri variquẽ-nase rãca gãmerã mairoti ñaja. ²⁶ Mani rujũ, cojojũ rojose ti tãmuojama, mani rujũ jedirone rojose tãmuojedicõaja. To yicõari, mani rujũ, cojojũ quẽnaro ti yiecojama, mani rujũ jedirone quẽnaro yiecojedicõaja.

²⁷ To bajirone bajiaja mani Cristore ajitirũnurã quẽne. Tocãrãcũne ĩ yarã ñaja mani. Sĩgũ mani rãcagũ ĩ sutiritijama, mani jedirone ĩ rãca sutiritiaja. To yicõari, sĩgũ mani rãcagũ ĩ variquẽnajama, mani jedirone variquẽnaja mani. ²⁸ “Jãjarã ñacõari, ricati yato ĩna” yigũ, tocãrãcũre ĩ masisere manire ɱjoyumi Dios. To bajiri ĩ bajirere goticudironare yuare cõacami Jesús. Gãjerã, ĩre gotirẽ-tobosaronare cũñumi Dios. Gãjerã, Dios oca gotimasioronare cũñumi. Gãjerã, ĩaĩañamani yĩoronare cũñumi. Gãjerã, rijaye cutirãre catioronare cũñumi. To yicõari, gãjerãrema ejarẽmoronare cũñumi. Gãjerãrema, Cristore ajitirũnurãre ũmato ñaronare cũñumi. Gãjerãrema, ĩna masibeti oca ñaboasere ñagõronare cũñumi. ²⁹ “Ricati rĩne yiruarãma” ĩ yiriarã ñari, mani jedirone, Jesús ĩ bajirere goticudirã me ñaja. Mani jedirone Diore gotirẽtobosarã me ñaja. Mani jedirone, Dios ocare gotimasiorã me ñaja. Mani jedirone, ĩaĩañamani yĩorã me ñaja. ³⁰ Mani jedirone, rijaye cutirãre catiorã me ñaja. Mani jedirone, mani masibeti ocare ñagõrã me ñaja. Mani jedirone, mani masibeti oca ĩna ñagõsere buemena ñaboarine, tire ajimasicõari, gotirẽtoburã me ñaja. ³¹ To bajiri, jedirone masijeobetiboarine, quẽnamasusejuare ĩ ɱjorotire sēniña.

To bajiro mũa yiboajaquẽne, gajeye ñaja rētoro ñamasuse. Tire mũare gotigũagũ yaja yũ.

13

“Gãjerãre mani maise ñaja ñamasusema”, yire queti

¹ Cojo oca ruyabeto mani ñagõmasiboajaquẽne, to yicõari, ángel mesa yere quẽne ñagõmasijocõaboarine, gãjerãre mani maibetijama, vaja mana ñarãja mani. Ñagõre me ñaroja. Buto busisere yibusiorãre bajiro yirãja mani, gãjerãre mani maibetijama. ² Diore gotirẽtobosarã, to yicõari, Dios ye masa ñna masibetire masijeorã ñaboarine, gãjerãre mani maibetijama, vaja mana ñarãja mani. “Manire ejarẽmorucumi” Cristore yituoïarã ñari, gũtare, “Gajeroju vurũgũcoasa mua masune” yimasiboarine, gãjerãre mani maibetijama, vaja mana ñarãja mani. ³ “Masare ñnare maibetiboarine, maioro bajirãre jediro yu cõosere ñnare ñsijeocõari, yu masu ruju quẽne ñnare rijabosacoarucuja” yu yijama, “Quẽnaro yigu ñaami” yure ñna yivariquẽnasere bojagu yu yijama, Dios taju ñie vaja bujabecuja yu.

⁴ Gãjerãre mani maijama, ado bajiro bajiruarãja mani: Rojose manire ñna yiboajaquẽne, ñnare jũnisinimenane, quẽnasejuare ñnare yiruarãja. Quẽnaro ñna ñajama, “Yua rẽtoro quẽnaro ñaama”, yiajũnisinirã me ñnaruarãja. “Ñamasurã ñaja yua” yirã me ñnaruarãja. ⁵ Quẽnaro mani ñnase rĩ mere tuoïarãja mani. Gãjerã quẽnaro ñna ñasere quẽne tuoïarãja. Gãjerã rojose manire ñna yiboajaquẽne, ñnare rĩcuborã, yoaro mene jũnisini tujacoaruarãja. ⁶ Gãjerã rojose ñna yisere ñavariquẽnamenaja. Quẽnaro ñna yisejuare ñavariquẽnarãja. ⁷ Gãjerã rojose ñna yijare, buto rojose mani tãmõose ti ñaboajaquẽne, ñnare maitujamena ñari, ñnare ñagõmacamenaja. Rojose ñna yiboajaquẽne, quẽnaro ñna yiro tire tuoïacõa ñnaruarãja.

⁸ Gãjerãre mani maise, jedise me ñaja. Diore gotirẽtobosarejuama, jedise ñaja. Masa ñna masibeti oca ñagõre, mani masise quẽne, jedise ñaja. ⁹ Ado bajiro ti bajijare, “Jedise ñaja”, muare yaja yu: Adirodori Dios ñ masise manire ñ yjose ti ñaboajaquẽne, jediro masibeaja mani. Ñre

gotirētobosare Dios ĩ ɯjose ti ñaboajaquēne, ñajediro ajimasibeaja mani. ¹⁰ To bajiboarine, ĩ tɯjɯ mani ejaro, ĩ masisere manire ĩ ɯjojare, jediro ajimasijeocōaruarāja mani. To cōrone adirodoriaye mani masise, vaja maniruaroja.

¹¹ Ado bajiro bajiaja: Daqueguaca yɯ ñajama, ñagōjeomasibeticajɯ yɯ maji. To bajicōari, quēnaro tuoĭabeticajɯ. Вучуасɯjɯ, to bajiro yɯ bajicatire yitɯjacajɯ yɯ. ¹² Tire bajirone bajiaja adi quēne: Quēnaro ruyubetiase ěoro ĩariarore bajiro Dios yere quēnaro ajimasijeobeaja mani maji. To bajiboarine, Dios tɯjɯma ěoro quēnaro ruyubetiase ĩarāre bajiro me Diore ĩaruarāja mani. To cōrojɯma quēnaro ajimasijeocōaruarāja mani yuja.

¹³ To bajiri idia vāme ñaja, adirūmuriaye ñamasuse mani yirūgūroti: Diore ajitirūnrūgūroti ñaja. Gaje vāme, “Dios ĩ gotiriarore bajiro ĩ masise manire ɯjojeocōarɯcɯmi”, yituoĭarūgūroti ñaja. To bajicōari, tusari vāme ñaja ñamasuri vāme, “Gājerāre mairūgūroti ñaja” yiri vāme.

14

Gajeye oca masiñamani ñaboasere ĩna ñagōre queti

¹ To bajiri gājerāre mani maise ñamasuse ti ñajare, mani yimasiro cōro gājerāre mairūgūto mani. To yicōari, gajeye Dios ĩ masise ĩ yarāre ĩ ɯjosere buto bojarā ñari, ĩre sēnirūgūroti ñaja. Tire bojarā, gajeye mɯa bojaro rētoro Diore gotirētobosarotire mɯare ĩ ɯjosere mɯa bojajama, quēnaja. ² Ado bajiro ti bajijare, to bajise mɯare yaja yɯ: Sĭgū, masiñamani oca ĩ ñagōjama, masare ñagōgū me yigumi. Diore ñagōgū yigumi, Esp'iritu Santo ĩ ɯjose rāca. ĩ rācanajɯama, ĩre ajimasimenama, “To bajirone bajiato” yigɯ, Dios ĩ yise ti ñajare. ³ Gājijɯama, Diore gotirētobosagu, masare gotigɯ yigumi. To bajiro ĩ yijare, butobusa Diore ajitirūnrāma. ⁴ Masiñamani oca ñagōgūrema, ĩ

sīgũrene quẽnaja ti. Gãji, Diore gotirẽtobosagũjũama, ã rãca rẽjarãre ejarẽmogũ yigũmi.

⁵ To bajiri sīgũ ruyabeto oca masiñamanire mũa ñagõjama, quẽnaroja. To bajiboarine, Diore mũa gotirẽtobosajama, rẽtobũsaro quẽnarũaroja. To bajiboarine, masiñamani oca ñagõgũ ã ñagõrone, “Mani rãca rẽjarã ajimasicõari, bũtobũsa Diore ajitirũnũato” yigũ, gãji tire ã gotirẽtobujama, ñamasuse moagũ yigũmi, ã quẽne. ⁶ Ado bajiro bajiaja: Yũ mairã, mũare ãagũ ejagũ, masiñamani oca yũ ñagõjama, ¿no bajiro mũare ejarẽmogũ yiguada yũ? Mũare yũ ejarẽmorũajama, ado bajirojũa yiroti ñaja: Dios ã ejarẽmose rãca ã ocare buecõari mũare gotiroti ñaja. To bajiro yũ yibetijama, ã ocare buebetiboarine, ã ejarẽmose rãca tũoĩacõari mũare gotiroti ñaroja.

⁷ Gotimasiore queti mũare gotigũ yaja: Tõroare quẽnaro ã jutibetijama, “Ti basare jutigũ yami”, yimasĩna manoja. To bajirone bajiroja arpa vãme cutijũre quẽne. Quẽnaro ã yibũsiomasibetijama, “Ti basare yami”, yimasĩna manoja. ⁸ Surarare jigũ, trompeta vãme cutiju quẽnaro ã jutibetijama, “Sĩarotigũ yiromi”, ãre yiajimasimenama, quẽnaro ã jutibeti ti ñajare. ⁹ To bajirone bajiaja, gãjerã, oca masiñamani mũa ñagõboajama. Mũa ñagõboasere ajimasibeticõari, “To bajiro yire ãni ñaja”, yimasibetirũarãma ãna. To bajiro bajica yiro, masa mano ñagõriarore bajiro bajicõaroja. ¹⁰ Adi macarũcũrore jãjarã masa ñarãma ricati rĩne ñagõrã. ãna cojo masama, gãmerã ajicõarãma. ¹¹ To bajiboarine, yũ ocare ajibecu rãca, yũa ñagõboajama, gãmerã ajimasimenaja. To bajiro ti bajijama, gãmerã ejarẽmomasiña manoja. ¹² To bajirone bajiroja mũare quẽne, masiñamani oca mũa ñagõjama. Gãjerãre ejarẽmomasimenaja. To bajiri, Esp'iritu Santo ã masise mũare ã ãjorotire bũto bojarã ñari, gãjerãre ejarẽmorotijũare sẽnĩna, “Bũtobũsa Diore ajitirũnũato”

yirã.

¹³ Gãjerãre ejarëmorotire tuoïarã ñari, masiñamani oca ñagõrã quëne, Diore sëniña mua, “Ti ocare buebecu ñaboarine, ajimasicõari, gãjerãre gotirëtobumasirã ñarãsa” yirã. ¹⁴ Diore sëniñũ, oca masiñamani yu ñagõjama, Esp'iritu Santo ï ejarëmose rãca to bajiro ñagõgũja yu. “To bajiro yiruaro yaja” yimasibetiboarine, ñagõgũja yu. To bajiri gãjerãma yure ajimasimenama. ¹⁵ To bajiro ti bajijare, ado bajiro yiroti ñaja: Cojojirema Esp'iritu Santo ï masise yure ï ãjose rãca Diore sëniroti ñaja. Gajejuma, yu masune tuoïacõari, ïre sëniroti ñaja. Cojojirema Esp'iritu Santo ï masise yure ï ãjose rãca basaroti ñaja. Gajejuma, yu masune tuoïacõari, basaroti ñaja. ¹⁶ To bajiro mani yibetijama, Esp'iritu Santo manire ï ãjose rãca Diore mani yirũcubujama, “Tire ñagõrã yama”, manire yimasimenama ñna. To bajiri, mani rãca Diore yirũcubomasimenama. ¹⁷ “Quënarõ yaja mu” Diore mani yiboajaquëne, manire ajimasibeticõari, quënabusaro Diore ajitirũnumenama gãjerã. ¹⁸ Mua rëtoro masiñamani oca ñagõjaja yu. To bajiri, yu masibeti oca ñaboasere yu ñagõmasise yure ï ãjose ti ñajare, “Quënarõ yaja mu”, Diore ïre yaja yu. ¹⁹ To bajiboarine, cojomocãrãca vãme cõro gotimasioruarũgũaja, quënarõ ñna ajimasirotire yigu. Diez mil ñari vãme ñase oca gãjerã ñna ajimasibeti yu gotijama, ajimasibetiborãma.

²⁰ Yu mairã, rĩamasare bajiro tuoïabesa mua. Bucurã ñna tuoïarore bajiro tuoïacõari, quënarõ tuoïamasina, yu gotimasiosere. Rojosere rĩamasa ñna tuoïamasibetore bajiro mua quëne rojosejũarema yibeticõaña. ²¹ Dios ocare masa ñna ucamasire ti gotijama, ado bajiro gotiaja: “Ñna tũju gajeje oca ñagõrãre cõarucũja. To bajiro yu yiboajaquëne, yure ajibeticõa ñaruarãma”, yigotiaja Dios oca masa ñna ucamasire. ²² Ado bajiro manire yaja ti:

“Masiñamani oca, Espiritu Santo ï masisere manire ï ÷jose rãca mani ñagõjama, Cristore ajitirũnurã ïna ïaro rĩjoro ñagõroti me ñaja. Ïre masimena ïna ïaro rĩjorojua ñagõroti ñaja”, yaja ti manire. To yicõari, Diore mani gotirõtobosajama, Cristore ajitirũnumena ïna ïaro rĩjoro ñagõroti me ñaja. Ïre ajitirũnurã ïna ïaro rĩjorojua ñagõroti ñaja, “Quẽnabusaro Cristore ajitirũnuato ïna” yirã. ²³ To bajiro muare gotiboarine, ado bajise muare yicõa ñaja yu: “Masiñamani oca mani ñagõjama, ñie vaja manoja. Tire ajimasimenama gãjerã”, muare yicõa ñaja yu. Mani jediro rëjacõari, masiñamani oca mani ñagõjama, gãjerã Cristo ï bajirere ajimena, to yicõari ocare ajimena, sãjaejacõari, “Mecurã yama”, manire yĩaruarãma. ²⁴ To bajiboarine, Diore mani gotirõtobosañarone, sãjaejacõari, Dios oca ti ñajare, “‘Rojose yirã ñaama’ yuare yĩagũmi Dios”, yimasiruarãma Cristo ï bajirere ajimena. ²⁵ “Yua usuriju rojose yua tuoĩasere masicoami Dios”, yiruarãma. To yicõari, Diore rũcuborã, gusomuniari tueturuarãma ïna. To yicõari, “Socarã me yaja mua. Mua rãcane ñagũmi Dios”, yiruarãma.

“Rëjacõari, Diore rũcuborã, ado bajiro yirũgũroti ñaja”, yire

²⁶ Yu mairã, rëjacõari, Diore rũcuborã, ado bajiro mua yijama, quẽnaja. Sígũri basa, gãjerãma, Dios ocare buecõari gotimasio, gãjerãma, Dios ïnare ï ñagõrotisere goti, gãjerãma, masiñamani oca ñagõ, to yicõari, gãjerãma, masiñamani ocare ajimenare, “Ado bajiro yiruaro yaja”, ïnare yiruarãja mua. “Quẽnabusaro Diore ajitirũnuato” yirã, ti jediro gãmerã ejarẽmoruarãja mua. ²⁷ Masiñamani oca mua ñagõruajama, juarã, idiarã cõrone ñagõruarãja mua. Jãjarã ïna ñagõjama, quẽnabetoja. Sígũ ï ñagõro bero, ñagõrucumi gãji. Ï bero ñagõrucumi ñagõtusagũ. Ajimasimena ñaboarine, masiñamani oca

ĩna ñagõro bero, gãjerã ti ocare ajimenare ĩna gotisere, “Ado bajiro yiruaro yaja” ĩnare yigotimasiorimasu quẽne ñarucumi. ²⁸ “Ado bajiro yiruaro yaja” yigotirimasu ĩ manijama, ĩna ĩaro rĩjoro mua masibeti ocare ñagõbetiroti ñaja. Ñagõbumenane, mua tuoĩase rãca Diore mua ñagõjama, quẽnaja. ²⁹ Dios ocare mua gotimasiojama, juarã, idiarã cõrone ñagõruarãja mua. Gãjerã mua ñagõsere ajicõari, “Socabeama”, yajimasiruarãma. ³⁰ Sĩgũ, ĩ gotĩnarone, ĩ gotisere ajigujua, Dios ĩ ejarẽmose rãca tuoĩacõari, ĩ quẽne ĩ gotiruajama, gotisuoigujua gotitujato, “Ījua gotiato” yigu. ³¹ To bajiri, sĩgũ ĩ gotiro bero, gotirucumi gãji. Ī bero gotirucumi gãji. To bajiro rĩne yirũgũruarãja mua. To bajiro mua yivajama, sĩgũ ruayabeto Dios ocare ajivariquẽnaruarãma ĩna. ³² Diore gotirẽtobosarã, ado bajiro bajirã ñari to bajiro quẽnaro gotirũgũruarãja mua: Mua gotirẽtose Esp'iritu Santo muare ĩ ÷josere, “Ado cõrone tire yu gotijama, quẽnaja”, yimasirãja mua. ³³ Ñie oca mano mani rẽjasere ĩavariquẽnarucumi Dios. Rẽjacõari, gãjerã ĩna gotiruaro rucubumenane mani ñagõjama, ĩavariquẽnabecumi.

To bajiri gãjerã Jesũre ajitirũnurã ĩna rẽjarore bajiro, rojose oca mano mua rẽjajama, quẽnaja. ³⁴ Diore rucubworã, ĩna rẽjaro, rõmiama ñagõbetirona ñaama, to bajiro ĩna yibetirũgũre ti ñajare. ĩna manajua ĩna rotirore bajiro cudiroti ñaja. To bajirone gotiaja Dios ocare masa ĩna ucamasire. ³⁵ ĩna masiruajama, ĩna ya viju tudiejacõari, ĩna manajua ĩna sēniĩajama, quẽnaroja. “Rẽjariavijure ñagõbetiruarãma rõmia” yire ti ñajare.

³⁶ ¿No yirã yu gotirore bajiro yibeticõa ñati mua maji? “Ī oca yuare cũñumi Dios, ‘Gãjerã masare quẽnaro riojo gotibosato’ yigu”, ¿yituoĩaboati mua? “Yua rĩne Dios ocare masa ĩna ucamasirere masirã ñaja yua”, ¿yituoĩaboati? Mua rĩ me ñaja Dios ocare ajicana. ³⁷ Sĩgũ,

“Diore gotirētobosagu ñaja yu” ï yijama, mũare yu gotisere ajicõari, “Dios ï rotirore bajirone gotiami Pablo”, yimasirucumi. To bajirone yiruarãma gãjerã quẽne, “Esp'iritu Santo ï masise yuare ï ñjose rãca gãjerãre ejarẽmoaja yua” yirã. ³⁸ Yu gotimasiosere, “Socase ñaja” sīgũ ï yigotijama, ïre ajibeja.

³⁹ Yu mairã, ado bajiro mũare yaja yu: Diore gotirētobosaroti, Esp'iritu Santo mũare ï ñjorotire bato bojarũgũña. Rējacõari, gãjerã masiñamani oca ñna ñagõjama, “Ñagõbesa”, ñnare yibeja. ⁴⁰ To bajiboarine, gãmerã rũcubũorã, quẽnaro tuoĩacõari, yu gotirore bajiro yirũgũña.

15

“Socase me ñaja Cristo ï tudicatire”, yire queti

¹ Yu mairã, quẽna Cristo ï bajirere mũare yu gotimasiosuocatire mũa tudituoĩasere bojaja. Tire ajicõari, Cristore ajitirũnrã ñacoacaju mũa. ² To bajicõari, “Pablo ï gotirore bajirone yiyumi Cristo” mũa yitujabetijama, rojose mũa tãmuoborotire mũare yirētobosacõari, quẽnaro mũare yirucumi Dios. To bajiboarine, mũa ajitirũnu tujajama, mũare yirētobosabetirucumi Dios.

³ Ti oca ñamasuse, Cristo yũre ï goticati ñacaju. Ado bajiro bajiaja: Dios ocare masa ñna ucamasire ti gotirore bajirone rojose mani yise vaja manire rijabosayumi Cristo.

⁴ ïre ñna jajusiãro bero, ïre yujeyujarã ñna. To bajiboarine, idiarũmu tusatirũmũne Dios ocare masa ñna ucamasire ti gotirore bajirone ïre catiõyumi Dios. ⁵ To ï yijare, tudicatĩcõari, Pedrore ruyuaõõuju Cristo. Bero, ï buerã ñnariãrã cõrore ruyuaõõuju quẽna. ⁶ Bero, gãjerã quiniento rẽtoro ñarãre ïre ajitirũnrãre ruyuaõõuju Cristo. To bajiri, jãjarã caticõama maji, to bajiro ï bajirere ñariãrã. Gãjerãma,

rijareacoasuma. ⁷ Bero, Santiagore ruyuañoñuju. Bero, ï ocare ï gotiroticõariarã jedirore ruyuañoñuju.

⁸ Ìnare ï ruyuañoriaro bero, yure quêne ruyuañocami. Ìre yu ajitirũnuroto rĩjoro, “Cristore ajitirũnurocu ñagũmi”, yure yimasibeticama masa. Gãjerã Cristo rãca ñacõari, ïre ñna ajitirũnuriarore bajiro ïre ajitirũnubeticaju yu maji. ⁹ Ìre ajitirũnurãre buto rojose ñnare yisuyacacu ñari, Cristo ocare gotigu ñaboarine, ñamasugũ me ñaja yu. Gãjerã ï ocare ï gotiroticõariarã ñaama ñamasurãma. ¹⁰ To bajiboarine Dios, yure ñamaicõari, Cristo suorine ï ocare yure gotiroticõañumi. Quẽnaro yure ï yijare, quẽnaro ïre moabosaja yu. To bajiri, “Ìre gotirotiboacaju yu”, yure yibecumi. Gãjerã Cristo ï oca ï gotirotiriarã rõtobusaro gotimasiorũgũaja yu, “Jãjarãbusa ïre ajitirũnurã ñato” yigu. Yu masune yigu me yaja. Yure ñamaicõari, quẽnaro yure ejarẽmorũgũgũmi Dios. ¹¹ Cristo ï bajire yu gotijama, gãjerã Cristo ï gotirotiriarã ñna gotijaquêne, no yibeaja. Jediro mũare yua gotise, ti rĩne ñacõaja, mũa ajitirũnucati.

“Mani rijato bero, quẽna mani tudicatibetijama, vaja maniboroja Cristore mani ajitirũnuse”, yire queti

¹² To bajiri, “Ì rijato bero ïre catiomyi Dios” yua yigotise ti ñaboajaquêne, mũajũama, ¿no yirã “Bajireariarã, tudicatimenama”, yati mũa? ¹³ To bajiro mũa yisere quẽnaro tuoĩaña mũa: Tudicatire ti manijama, Cristo quêne tudicatibetiborimi. ¹⁴ Cristo ï rijato bero, Dios ïre ï catiobetijama, ï oca masare yua gotise, vaja maniboroja. Ìre mũa ajitirũnuse quêne, vaja maniboroja. ¹⁵⁻¹⁶ To bajiri, Dios Cristore ï tudicatiobetijama, socasere Dios ï gotiroticõarãre bajiro bajiborãja yua. “Bajireariarã tudicatibeticõato” ï yijama, Cristore quêne ïre tudicatiobetiborimi Dios. ¹⁷ “Tudicatibetirimi Cristo” mũa yituoĩajama, ïre mũa ajitirũnuse, vaja maniboroja. Rojose mũa

yisere muare masiriobetiborimi Dios. ¹⁸ To bajicõari, Cristore ajitirũnurãrã quẽne, tudicatio ecomenare bajiro bajirãma bajireariarã, Cristo ã tudicatibetijama. ¹⁹ Cristore ajitirũnurã ñaboarine, mani tudicatibetijama, ãre ajitirũnumena ãna sutiritiro rãtoro tãmuoborãja mani.

²⁰ Ado bajirojua bajiaja: Cristo ã rijacoaboajaquẽne, ãre catioyumi Dios. To bajiri ã ñagũmi, rijacoaboarine, quẽna tudicaticõari, rijabetirocu ñasuoꝑuma. To bajiro ã bajijare, “Mani quẽne ãre ajitirũnurã ñari, rijacoaboarine, ãre bajiro quẽna tudicaturãrãja”, yimasiaja mani. ²¹ Sĩgũ suorine masa bajireare ñasuoꝑuja. To bajiboarine, quẽna sĩgũ suorine bajireacoaboarine, tudicature ñasuoꝑuja. ²² Ado bajiro bajiaja: Adãn ñamasir'i jãnerabatia ñari, rijaruarãja mani. To bajiboarine Cristore ajitirũnurã ã yarã mani ñajare, manire catiorucumi Dios. ²³ Cristo ñagũmi rijacoaboarine quẽna tudicatisuor'i. To bajicõari, adigodoju ã tudiejaru, ãre ajitirũnurãrã tudicaturãrãma. ²⁴ To bajiro ti bajirone, adi macarucuro jediruaroja. ãre ãaterã ñaru cõrone ãna rotiboasere ãnare yirotibetirucumi Cristo. Adigodoana rojose yirotirã, õ vecana rojose yirotirãre quẽne ãnare yirotibetirucumi. To yigajanocõari, ñajediro, ãre ajitirũnurãre ã jacu Diojuaare uorucumi, “Ñajediro uju ñamasugũ ñarũgũrucuja mu” yigũ. ²⁵ Cristo ado bajiro yirocu ã ñajare, “To bajirone bajiruaroja”, muare yaja yu: Cristo ã jacure ã uoroto rĩjoro, ã rotiñarirodone, ãre ãaterã ñaru cõrone ãna rotiboasere ãnare yirotibetirucumi. ²⁶ ãre ãaterã ãna rotiboasere yirotibeticõari, quẽna masa ãna bajirease quẽne bajibetirotirucumi Cristo. To bajiri ãre ajitirũnurãrema, juaji rijare maniruaroja. ²⁷ Dios ocare masa ãna ucamasire ti gotirore bajirone jediro uju ñarocure Cristore cũrucumi Dios. Bajigujuma, ã jacure rotigu me ñaami Cristo. ²⁸ To bajiri, ãre ãaterã ñaru cõrone ãna rotiboasere ãnare yiroti-

beticōari, jedirore rotigu ñarucumi Cristo. Tirūmune ĩ ro-timasirotire ĩ ũjorere ĩre tudĩsirucumi, ĩ jacure, “Ñajediro ũjũ ñamasugũ ñarucuja mũ” yigu.

²⁹ “Bajireariarã tudicatimenama” sīgũri mũa yisere tuoĩacōari, gajeye mũare gotirēmorũaja yũ. ¿No yirã, bajireariarã, oco rãca bautiza ecobetiriarãre tuoĩacōari, “Īnare bautiza ecobosato mani”, yati mũa? Bajireariarã ĩna tudicatibetijama, oco rãca ĩna bautiza ecore vaja maniboroja ti. ³⁰ Gãjerãre Cristo ĩ bajirere yũa goticudise quẽne, vaja maniboroja ti. Tire yũa goticudijare, rojose yũare ĩna yirũase ti ñaboajaquẽne, goticudicōa ñaja yũa. Bajireariarã ĩna tudicatibetiboajaquẽne, ¿no yirã to bajise yicōa ñati yũa? ³¹ Yũ mairã, riojo mũare gotiaja yũ. Bũto yũre ĩna sĩarũajare, tocãrãcarũmune tire tuoĩarũgũaja. To bajiboarine, tire yũ tuoĩaro cōro yũ goticati suorine Jesucristo mani ũjũre mũa ajitirũnusere tuoĩavariquẽ-narũgũaja. ³² Adoana, Efeso macana yũre ĩatecōari, bũto rojose yũre ĩna yirũaboajaquẽne, tone goticōa ñacajũ yũ. Bajireariarã ĩna tudicatibetijama, yũ goticati vaja, vaja bũjabetibogũja yũ. Mani rijato bero, mani tudicatibetijama, Cristore ajitirũnumena ĩna tuoĩarore bajiro tuoĩaroti ñaboroja. Ado bajiro tuoĩarãma ĩna: “Mani bajireacoajama, tudicatimenaja mani” yituoĩarã ñari, “Mani bojarore bajiro yito mani”, yituoĩarãma.

³³ To bajiro ĩna yisere ajitirũnũbesa. “Rojose yirã rãca mũa baba cutijama, quẽnaro yirã ñaboarine, ĩnare bajiro rojose yirũarãja mũa quẽne” yirere masiritibesa. ³⁴ “Mani rijato bero, tudicatimenaja mani” mũa yituoĩaboasere to cōrone tuoĩatujaya mũa. To yicōari, rojose mũa yisere quẽne yitujaya. “Rojose yirã rãca baba cutibesa”, mũare yibũ yũ, mũa rãcana sīgũri Diore masimena ĩna ñajare. Tire mũare gotiaja yũ, yũ gotisere ajicōari, mũa tuoĩabojonerotire yigu.

Rijacoaboarine, quēna mani tudicatiroti queti

³⁵ “Mani rijato bero, tudicatiroti ñaja manire” m̄are yu yiboajaquēne, sīgūri ñarāja m̄a ado bajise sēniñarā: “Bajireariarā ñaboarine, ¿no bajiro tudicatrāda? To yicōari, ¿no bajiro ruju cutirāda?”, yure yisēniñarāja m̄a.

³⁶ To bajiro yure m̄a sēniñajama, quēnaro t̄oĩamasimena yirāja m̄a. Ado bajiroj̄ma bajiaja: Ote mani otejama, joeaye boacoatoja. To bajiboarine, jubeayej̄ma judiroja.

³⁷ Trigo aje, gajeye mani otejama, ruju jediro me oteaja mani. ³⁸ Mani otero bero, “Ote ti ñarore bajirone judiato” yiḡu, tire judirotimasiḡumi Dios. Trigo aje ti ñajama, trigo judir̄aroja. ³⁹ Gajeyere quēne t̄oĩaña: Mani catirā, jediro ricati r̄ine ruju cutiaja mani. Masa, vaib̄c̄urā, minia, vai quēne ricati r̄ine ruju cutiama. ⁴⁰ Ō vecana quēne, ricati ruju cutirāma. “Ō vecana ñato” yiḡu, ñnare rujeoyumi Dios. To bajirone bajiaja, adigodoaye quēne. “Adigodoaye ñato” yiḡu, tire rujeoyumi Dios. To bajiri ricati ñaja ti. Ricati ñaboarine, quēnase r̄ine ñacōaja. ⁴¹ To bajirone bajiaja űm̄aḡu muiju ĩ bususere quēne. űm̄aḡu muiju ĩ busuro cōro me busuami ñamiaḡu quēne. To bajicōari ñamiaḡu muiju ĩ busuro cōro me busuama ñocoa quēne.

⁴² To bajirone bajir̄arāja mani. Mani rijato bero, quēna tudicaticōari, ricati ruju cutir̄arāja mani. Mani ruj̄ire ḡajerā ĩna yujero bero, boacoatoja. To bajiboarine, bero ricati ruju Dios manire ĩ ĩsirotij̄uama, rijabetirotiruj̄u ñar̄aroja. ⁴³ Mani ruju boarotiruj̄u ñaja. To bajiboarine, bero Dios manire ĩ ĩsirotiruj̄uama, no yimasĩnamani ruju ñar̄aroja. ⁴⁴ Mani ruju, “Adigodoj̄u ñato” yiḡu, Dios ĩ rujeoriaruj̄u ñaja. To bajiboarine, bero Dios manire ĩ ĩsirotiruj̄uama, “Yu r̄aca quēnaro ñar̄arāma” yiḡu, manire ĩ ĩsirotiruj̄u ñar̄aroja.

⁴⁵ Ado bajiro gotiaja Dios ocare masa ĩna ucamasire: “Adán ñamasir'ire ĩ catirotire ĩre ĩsimasiñuju Dios”, yig-

otiaja. Adán beroagu ñaboarine ï rëtoro ñamasugũ ñaami Cristo. Ñne ñaami ïre ajitirũnurã, rijacoaboardine, tudirijayamanire Ʃjogu. ⁴⁶ To bajiro ti bajiboajaquêne, ï rãca õ vecaju ñarotiruju mere manire ïsisuoyumi. To bajiro ï yiro bero, õ vecaju ï rãca mani ñarotirujure manire ïsirucumi. ⁴⁷ Adán ñamasir'ire sitane rujeomasinuju Dios. To bajiri adigodoagu ñamasinuju ï. Bero vadir'i, Cristojuaama, õ vecaju vadir'i ñañuju. ⁴⁸ Adigodoana Adán ñamasir'iruju cutiriarore bajiro ruju cutiaja mani. To bajirone bajiruaroja, manire Cristore ajitirũnurãre quêne. Cristo, rijacoaboardine, tudicaticõari, ï ruju cutiriarore bajiro ruju cutiruarãja mani quêne.

⁴⁹ Adigodoana Adán ï ruju cutimasiriarore bajiro rujuri cutirã ñaja mani. To bajiboarine, Dios tuju ejacõari, Cristore bajiro ruju cutiruarãja mani.

⁵⁰ Yu mairã, ñamasusere muare gotigu yaja yu: Ado mani ruju cutisema Dios tuju ñarotiruju me ñaja. Gaje ruju, ruju cuticõari, Dios tuju ñaruarãja. ⁵¹ Quënaroyure ajiya mu. Masa ñna masibeticatire muare gotigu yaja yu: Cristo ï tudiejaroyure ajitirũnurã jediro rijajebetiboarine, sigũ ruyabeto gaje ruju, ruju cuticoaruarãja mani. ⁵² Trompeta vãme cutiju, ñna jutibusiorone, guaro cajea bibitiarore bajirone bajireariarã, tudicaticõari, rijabetirotiruju, ruju cutiruarãma. To bajiro ñna bajirone, mani quêne bajireamenane Cristore ajitirũnurã ñari, gaje ruju, ruju cutiruarãja mani. ⁵³ Ado bajiro ti bajijare, to bajiro bajiroti ñaja: Mani ruju cutise, rijacõari, boaroti ñaja. To bajiri rijabetirotirujujuare, ruju cutiroti ñaja. ⁵⁴⁻⁵⁵ To bajiro mani ruju cutirone, Dios ocare masa ñna ucamasire ti gotirone bajiro bajiruaroja. Ado bajiro gotiaja: "Rijaroti ñaboasere reajeorucumi Dios. To bajiro ï yijare, ïre ajitirũnurã, tudirijabetiruarãma. To bajiri, no yirã ñna bajirotire güimenama", yigotiaja Dios ocare masa

ĩna ucamasire. ⁵⁶ Dios ĩ rotimasiriarore bajiro yimena ñari, rojose tãmuorãma. To bajiro bajiroti ti ñajare, ĩna bajirearotire güirãma masa. ⁵⁷ To bajıboarine, mani ıjı Jesucristo manire ĩ rijabosare ñajare, mani bajirotire güibeaja mani. Tire tıoıacõari, “Quẽnaro yaja mu”, Diore yito mani.

⁵⁸ To bajiri Jesucristore ajitirũnu tıjabetiruarãja mua, yu mairã. To yicõari, mua yimasiro cõro Dios ĩ bojasere yirũgũña. “Ñajediro Dios ĩ bojase mani yijama, quẽnaro manire yirũcumi” yıtıoıacõari, to bajiro yirũgũña.

16

Jerusalén macanare ejarẽmorã, gãjoa ĩna juarẽore queti

¹ Gãjerã Cristore ajitirũnurãre ejarẽmorã gãjoa mua juarẽorotire muare gotıgu yaja. Galacia sitana Cristore rũcũborã ĩna rẽjaro, ĩnare quẽnaro yu roticatore bajiro muare rotıgu yaja. ² Tocãrãca domingo ñaro, gãjoa mua ĩsiruarõ cõro, mua ĩsijama, quẽnaja. Tire cojojune juarẽocũma. To bajiro mua yijama, mua tıjı yu ejaro, tire juarẽoroti manıraroja. ³ Mua tıjı ejacõari, gãjoa mua cũsere juavarõnare, “Ãnoa ñaama tire juavarõna”, yiba. To bajiri, queti ĩnare ucabosarũcıja yu. “Ãnoa ñaama quẽnaro yirã. ĩnare quẽnaro bocaãmiña” yire queti ĩnare ucabosarũcıja yu, “Jerusalén macanare ĩoato” yıgu. ⁴ “Pablo rãca varuarãma” mua yıtıoıajama, yu rãca varuarãma.

Pablo, Corinto macajı ĩ varua tıoıare queti

⁵ Macedonia sitajı varũcıja yu. Tojı ĩacudıgu vacũne, mua tıjı ejarũcıja. ⁶ Yoaro, juebũcũ ñaro cõro mua rãca ñarũcıja, yu bajijama. Mua tu yu ñaro, gãjerã tıjı yu ĩacudıgu varõtire yirã, yure ejarẽmoruarãja mua. ⁷ Ado cõrone mua tu yu vajama, yoaro mua rãca ñabetibogıja yu. To bajiri mua tıjı vabeaja maji. Mani ıjı ĩ bojajama,

yoarobusa mua rãca ñaboguja yu. ⁸⁻⁹ Efeso macajune ñacõarucuja maji, jãjarã yure ñaterã ñna ñaboajaquene, Jesús ñ bajire yu gotimasiosere quẽnaro ajiruarã jãjarã ñna ñajare. To bajiri Pentecostés boserũmu adoana ñna yiro bero, varucuja yu.

¹⁰ Timoteo, mua tu ñ ejajama, “Manire güibecune, quẽnaro riojo gotiato” yirã, quẽnaro ñre yiba. Yure bajirone mani ujũ ñ bojasere yigu ñaami ñ quene. ¹¹ To bajiri ñre quẽnaro rucubuoaba. Yu tujũ vagu, muare ñarõtovagami. To bajiri, yu tujũ ejagu, “Variquẽnase rãca ejato ñ” yirã, quẽnaro ñre ejarẽmoma. Gãjerã Cristore ajitirũnrã rãca ñ ejarotire ñayuruarãja yu.

¹² Mani maigũ, Apolos ñ bajisere yure senniãcõañuja mua. Gãjerã Cristore ajitirũnrã rãca mua tujũ ñre varotirũgũboacaju yu. Varuabeticami. No bojarirũmu ñ vatirũmu, varucumi, bajigujama.

“Estéfnas mesa ñna rotirore bajiro mua yijama, quẽna”, Pablo ñ yire queti

¹³ Rojose yirãre güimenane, quẽnaro tuoĩacõari ñarũgũña mua. To bajicõari, mani ujũ Cristore tuoĩatujabesa, “Dios ñ bojasere yitujarobe” yirã. ¹⁴ Mua yise jediro quẽnaro gãmerã maire rãca yirũgũuarãja mua.

¹⁵ Acaya sitagu, Estéfnas, ñ yarã rãca Cristo ñ bajirere yu gotimasiosere ajitirũnũsucama. Adirũmuri ñnarã, Cristore ajitirũnrãre ejarẽmoama ñna. Tire masiaja mua.

¹⁶ ñnare, to yicõari, ñna rãca moarãre quene quẽnaro mua cudisere bojaja yu.

¹⁷ Estéfnas, Fortunato, Acaico ñna ejasere bũto variquẽnaja yu. Jediro yu tujũ mua ejamasibetijare, ñnajua, ejacõari, mua gotiroti ñaboasere quẽnaro muare gotibosama. ¹⁸ Quẽnaro muare ñna gotibosajare, mua variquẽnarore bajiro variquẽnaja yu quene. To bajiri,

“Yũare quẽnaro mũa gotibosajare, variquẽnaja yũa” yirã, quẽnaro ñnare yiba mũa.

Pablo, ñnare ñ quẽnaroticõare queti

¹⁹ Asia sitana Cristore ajitirũnũrã, “Quẽnato”, mũare yicõama. Aquila, ñ manajo Prisca, ñna ya vi rẽjarã quẽne, mani mũjũre ajitirũnũrã ñnari, mũare quẽnarotiama.

²⁰ Adoana Cristore ajitirũnũrã, mũare mairã, “Quẽnato”, mũare yicõama ñna quẽne. Gãmerã mairã ñnari, rẽjacõari, quẽnaro gãmerã yiba.

²¹ Yũ Pablo, yũ masune, “Quẽnato”, mũare yiuacõaja yũ.

²² Mani mũjũre ñre ajitirũnũmena, rojose tãmuotũjabe-tiriaroju varũarãma ñna. Mani mũjũ, yoaro mene ñ tudie-jasere bojaja yũ.

²³ Mani mũjũ, quẽnasere mũare cõarũgũato. ²⁴ Mũa quẽne, Jesucristore ajitirũnũrã mũa ñajare, “Mũare bũto tũõĩamaiaja”, mũare yicõaja yũ.

To cõro ñnaja.

Dios oca gotirituti

New Testament in Barasana-Eduria (CO:bsn:Barasana-Eduria)

copyright © 2010 Wycliffe Bible Translators, Inc.

Language: Barasana-Eduria

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Barasana-Eduria

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 8 Sep 2021 from source files dated 18 Aug 2021

b6661d38-f021-5259-8010-5dec5b9ba28d